



15. 1. 2020 / BROJ 48

GIMNAZIJALCI SA VILSONOVA





Sadržaj

DAN DRŽAVNOSTI

Svečana akademija povodom Dana državnosti BiH	2
25. novembar	3
Bosna od svile	3
25. 11. 2019.	3
Bosna	3
Sinovi Bosne	3

DEŠAVANJA U ŠKOLI

Zahvaljujemo na svim lijepim trenucima	4
Dobro nam došli!	5
Razmjena udžbenika	5
Ponosna STEM-škola	6
Biblioteka bogatija za brojne naslove	8
Knjige – najvredniji poklon	8
Donacija šest računara Vijeća Evrope	8
Uspješan nastavak DKU-a	9
„Jedan slatkiš, jedno dijete“	9
„Vršnjačko nasilje – NEMA ŠANSE“	10
Uspješna saradnja s gimnazijalcima iz Minhena	11
Uz osmijeh ponovo ćemo dočekati učenike iz Švedske	11
24. Decembarski dani kulture u Trećoj	12
Treća gimnazija ETOS-škola	14
Drugi ciklus projekta „Znanjem do razumijevanja“	14
16 dana aktivizma: Zahvalnost	15
S britanskim ambasadorom i ministricom pravde o borbi protiv korupcije	16
Josh Irby, radujemo se novom susretu!	16
„Cijenimo književnost“	17
DSD II ispiti učenika završnog razreda	17
Društveni angažman mladih	18
Kuhati ili ne kuhati?	18
Potrošnja i globalizacija	19
Das Tagebuch der Anne Frank: Graphic Diary	19
Njemački naučnici koji su promijenili svijet	20
Halloween zabava za DSD-ovce	20
Dramska sekcija sa „Okvirom za sliku“ rasplakala publiku	21
„Veče sa teatarskim i filmskim umjetnicima“	22
Poetski predah	23
Night Party	23
Sretan 17. rođendan!	24
Naši učenici budući alpinisti	24
Pobjeda u prijateljskoj utakmici	24
Najveća lekcija na svijetu u Trećoj gimnaziji	25
Podjela paketića	25

UČESTVOVALI SMO

Treće mjesto na Noći istraživača 2019.	26
Nagrade za najbolji scenarij i najbolji film	27
Drugo i treće mjesto na Sketch Street Basketballu	27
Trčim za inkluziju	28
Potpisan Sporazum o saradnji sa Specijalnom olimpijadom BiH	30
Zlatna Edna!	30
Pošumljavanje Velikog polja	31
Bili smo na najvećem domaćem forumu inovacija, tehnologije i poduzetništva	31
Zlatni pehar sa Atletskog kupa srednjih škola	32
„Znanjem protiv droge“	34
Prvo radno iskustvo naših učenika	34
Darujmo krv – spasimo život!	34
Najbolji nastup hora na Danima Matice hrvatske	35
Treće mjesto osvojila pjesma „Tama“	35

PUTOVANJA I IZLETI

Posjeta Potočarima	36
Druženje na jesenjem školskom izletu učenika	37
Članovi Planinarske sekcije na Tjentištu	38
Grad koji se ne zaboravlja	39
„Belgrade, my Belgrade...“	40

POSJETE

Zašto ne bismo obilježili maturu onako kako rade u svijetu?	41
Praktična citologija u „Suncu“	41
Posjeta trećem sajmu „Knjige u nišama“	42
Bili smo i na Zimskom salonu knjige	42
Promocija Zbornika radova „Alija Isaković i bosanski jezik“	43
Zaljubljanje uz predstavu „Radnja na uglu“	43
Nasmijali smo se uz „Umrli muški“	44
Dirljiva i uzbudljiva radnja predstave „Snijeg“	44
Nenadmašna i posebna „Helverova noć“	44
Pogledali smo „Naš razred“ u Kamernom	45
I za kraj 2019 – „Knjiga mojih života“	45

NAŠ SU PONOS

Azra Alagić: „Protivnik sam odlaska i svoj život želim izgraditi u domovini“	46
Iman Pašić, čarobni glas naše škole	47
Elma Slabić: „S ljudima, čije sam postere kao mala lijepila po zidovima, izađem na kafu poslije škole“	48

Svečana akademija povodom Dana državnosti BiH

U petak, 22. 11. 2019, u amfiteatru naše škole održana je priredba povodom Dana državnosti. Tom događaju su prisustvovali učenici i profesori. Program je započet himnom naše države, nakon koje je uslijedio nadahnjujući govor direktorice Senade Salihović: "Mi drugu domovinu nemamo, stoga je moramo štiti kako perom, tako srcem i dušom da sačuvamo ono najvrednije što imamo, što su u toku agresije na Bosnu i Hercegovinu sačuvali svi oni koji su dali i dijelove tijela i živote da mi možemo sada u miru radovati se svakom Danu državnosti Bosne i Hercegovine."



Nakon toga su nas članovi Historijske sekcije, koju vodi profesorica Emira Hubjer, vratili u bogatu prošlost naše BiH. Podsjetili su nas na najveće junake naše historije te na Prvo zasjedanje ZAVNOBiH-a, gdje je donesena odluka o obnovi državnosti BiH i potvrđene njene historijske granice koje datiraju iz vremena srednjovjekovne Bosne.

Također, posebno su nas takle izvanredne izvedbe pjesama članova naše najmnogobrojnije sekcije, sa profesoricom Aidom Kamenicom na čelu, a posebno „Moja BiH“.



Ljubav prema domovini iskazali su i članovi Literarne sekcije, sa profesorom Džemaludinom Poturovićem, koji su svojim radovima uveličali ovaj događaj.



Program su pjesmom upotpunili i učenici Ali Jusović, koji je uz pratnju harmonike Farisa Kasapovića izveo pjesmu „Bosno moja, divna mila“, i Anisa Resić izvedbom pjesme „S one strane Plive“. Svečana akademija završena je nastupom Plesne sekcije i benda Kontrapukt, uz osmijehe, pjesmu, ples i aplauze.

Zahvaljujemo učenicima i profesorima na uloženom trudu i divnoj publici sa kojima smo obilježili ovaj praznik.

*Hena Šehović, Izeta Redžepi, Merjem Milišić i Jasmina Pilav
Foto: Aydin Džebo, Arabela Murtić, Hana Lučkin, Berin Šurković*



25. novembar

Ide ponovo onaj dan, 25. novembar, Dan državnosti Bosne i Hercegovine. Dan kada vjera i nacionalnost ne bi trebali biti razlog svađe i opasnosti, kada nas razlike ne bi trebale razdvajati već činiti naše jedinstvo jačim, a kulturu bogatijom. Dan kada bi se na trenutak trebalo zaboraviti na sve negativnosti i osjećati ponosno što živimo u jednom baš takvom društvu i zajednici. Ustvari, takav bi trebao biti svaki dan, a ne samo 25. novembar. A šta nas to sprečava da bude? Do kad ćemo slušati priče koje nikamo ne vode? Ako očekujemo i želimo da se situacija poboljša, trebamo mijenjati pogled na stvari, krenuvši od sebe. Da li je situacija zaista tako loša kao što drugi govore, ili je takva samo u našoj glavi?

Merjem Gutošić, II₂

Bosna od svile

Vidi, prijatelju, kako se viori zastava. Vidi kako se vjetar sa njom igra kao sa vrbinom krošnjom. Vidi kako se presijava kao uplakano oko na svjetlu. Vidi kako drhti kao djevojka u mladićevom zagrljaju. Vidi kako je lijepa. Kako je lijepa postelja naše Bosne. Plava kao beskrajno plavetnilo iznad naših glava. Bosna je nebo. Nebo sa devet bijelih pramenova, devet oblaka na kojima lete naši snovi, snovi Bosne. Vedro dansko nebo, a opet sa zvijezdama. Nebo nade i čežnje. Nebom plovi i Sunce. Veliko užareno Sunce kao vječni izvor svjetla i borac protiv noći. Sunce od svile, nebo od svile, oblaci od svile, moja Bosna od svile.

Hena Gojak, IV₆

25. 11. 2019.

Često sam imala priliku pričati o domovini, a uvijek sam imala nešto novo da kažem. Govorila sam o njenoj ljepoti i raskoši, ali nikad nisam posvetila pažnju njenim ranama koje je čine jačom.

Rat je nešto što starije generacije žele zaboraviti, nešto o čemu ne žele razmišljati. Možda mislite da država koja prođe kroz takav strah i trepet ne može biti jaka kao prije. Toliko je toga podnijela, ali nije bila poražena. Hrabro je stajala dok su je mnogi gazili nastojeći da bude zaboravljena. Sumnjali su u nju i govorili da neće uspjeti, ali još uvijek njena stara leđa nose breme vremena. Zašto se nije predala? Šta je to tjeralo da nastavi dalje? Da li su to ljudi koji su bili tu za nju da se bore vjerujući da će biti bolje? Ovi ljudi su jaki i spremni snositi posljedice krvavog i surovog rata.

Mi još uvijek nosimo taj teret, a opet stojimo ponosno i gordo. Međutim, teret je bolan i za sobom ostavlja tragove. On otvara već zatvorene rane. On razara ljubav i sve što je srcu drago. Uistinu je potreban jak čovjek da ga nosi. Ali mi i jesmo jaki, svjesni tereta i spremni da se borimo s njim.

Bosna i Hercegovina je tu zbog onih koji je vole i uvijek vjeruju u njenu budućnost, zbog mladih koji su spremni da u nju ulažu.

Selma Salman, II₂

Bosna

Za gospođu Evropu
Mi smo vjerovatno samo krvava mrlja
U granicama od Save do mora,
Od Drine do Une.

Ali većina nas
Ne razmišlja na takav način,
A sigurno su i naši pradjedovi
Razmišljali tako.

Mnoge su polemike vođene,
Mnogi životi su ugrožavani,
Svi sve znaju,
A niko ništa ne zna.

Svašta ljudi pričaju,
Ali ja jedno znam,
Ako ne bude Bosne,
Neće biti ni nas!

Omar Jeina, II₂

Sinovi Bosne

O, Safete, Sajo, što u pjesmi opjevan si,
Vidiš li i ti, gore, da ona još postoji.
Kao što si davno rekao,
Rađaju se sinovi njeni ponosni.
Vidiš li i ti, Prvi predsjedniče,
Kako Drina i danas huči,
Sava, Vrbas, Una, Prača,
Svaka od njih o vijekovima zbori.
Aleksa, Meša, Ivo, da li još znate,
Da se, i poslije svega, vaše pjesme i priče prate,
Da se o Bosni i dan-danas piše,
A vaše stope niko ne može da izbriše.
Sinovi Bosne, što ste za nju život dali,
Vaše hrabro srce da li čuje sada,
Kako svaki kutak zemlje ove o vama zbori,
Svako od nas kaže: HVALA
Bila je i bit će, jedna zemlja balkanska,
U kojoj nada k'o žar tinja.
Nema tog dušmanina što je korak napravio,
A da ona još čvršće nije stala.
Domovino lijepa, što ti sunce rajske bašte krasi,
Nemoj nikad biti tuđa,
Nemoj nikad nikom da se predaš.
Znaš ti sama koliko bola u svom temelju nosiš,
Ne posustaj nakon svega.
O planine, o rijeke Bosne,
I vaš je došao dan.
Bosno moja lijepa, čestitam Ti,
Imaš državnost, nezavisna si!
Tvoj uspjeh je uspjeh svih nas.

Džejna Fehrić, IV₃

Zahvaljujemo na svim lijepim trenucima

Često su uspomene i sjećanja tačnije i od same stvarnosti. Život možda i nije ono što se desilo, već ono čega se sjećamo i kako se toga sjećamo. U život jedne škole utkani su i životi onih koji su se bavili i bave se jednom divnom profesijom u kojoj se sporije stari, jer raditi sa djecom znači uvijek biti na izvoru mladosti i kristalne energije. Zbog svih nas u njoj i nje u nama, zbog svih onih koji su je nekad gradili i svih nas koji je i danas gradimo, zbog onih koji će nastaviti tamo gdje smo mi stali, želim da uputim beskrajnu zahvalnost našim cijenjenim kolegicama profesoricama njemačkog jezika Emiri Hadžimuratović i Mari Matković koje su cijeli radni vijek utkale u našu školu i ovaj grad. Cijeneći njihov sveobuhvatan doprinos, naše uvažene profesorice obilježile su pola vijeka rada naše škole i našeg šehar Sarajeva.



Želim da vam zahvalim u ime svih generacija đaka koje ste izvele, posebno u ime đaka društvenog izbornog područja što ste imale za njih razumijevanje kad su ih skoro svi napadali i opravdano i neopravdano, kao uragan koji je prolazio, a oni završavali, odlazili iz škole i vraćali se u nju sa zahvalnošću.

Želim da vam zahvalim na prilici koju ste nam pružile da se profesionalno izgrađujemo u stabilnom okruženju.

Zahvaljujem na podršci i razumijevanju u svim prilikama kako na poslovnom planu, tako i za sve naše privatne probleme.

Zahvaljujem na podršci da individualno napredujemo.

Zahvaljujem na svim lijepim trenucima saradnje.

Zahvaljujem vam što ste uložile sve svoje sposobnosti i godine života da naša gimnazija radi, stvara, napreduje i niže uspjehe na takmičenjima, da iznjedri veoma uspješne mlade ljude koji su danas ostvareni u mnogim oblastima, a posebno na DSD, čiji ste vi bile osnivač i tako ga razvile do savršenstva u dugih četvrt stoljeća od male škole u Hrasnom do našeg giganta, gdje smo zajednički sa našom dragom direktoricom Eminom Avdagić dočekivali razne goste na čelu sa predsjednikom SAD-a Bilom Klintonom i njegovim saradnicima.

Najzad, zahvalnost je višestruka, složena i vjerujem da je pomenutim nepotpuno iskazana, ali dijelim je sa svakim kolegom u dijelu u kojem se prepoznao.

Nadam se da ćete uživati u svakom novom danu koji je pred vama, okružene ljudima koji vas vole i poštuju radujući se uspjesima svoje djece i nadasve veseleći se svakoj riječi i zagrljaju koje vam upućuju vaši unuci, kojih će, nadam se, biti i u većem broju.

*Profesorica Emira Hubjer,
Aktiv društvenog izbornog područja historije,
geografije i sociologije
Profesorica engleskog jezika Senada Redžepagić
Sarajevo, 28. 8. 2019.*



Dobro nam došli!

U ponedjeljak, 2. septembra 2019. godine, u amfiteatru škole priredili smo dobrodošlicu još jednoj generaciji naših učenika. Prvog dana nove školske godine upriličena je kratka svečanost na kojoj su se članice Uprave škole obratile novim učenicima, upoznale ih o pravilima



i dužnostima, te na kraju poželjele sreću u novoj školskoj godini. Prvačiće je zabavio i školski bend Kontrapunkt. Nakon prijema učenici su se sa novim razrednicima i školskim drugarima uputili u učionice. Nakon upoznavanja naši prvačići sa razrednicima obišli su školske prostorije i učlanili se u biblioteku.

Želimo dobrodošlicu u kolektiv Treće gimnazije!

Razmjena udžbenika

Kao i prethodnih godina u utorak, 10. septembra 2019. godine, gimnazijalci su u popodnevnom satima iskoristili lijepo vrijeme i razmijenili udžbenike u dvorištu škole.

Foto: Tajra Osmanagić i Tea Dedić



Ponosna STEM-škola

STEM-projekt se pod okriljem ENABLE BIH i Save the Childrena u Trećoj gimnaziji realizira već drugu godinu. STEM je, zapravo, način poučavanja zasnovan na interdisciplinarnom pristupu koji je u uskoj vezi sa situacijama i problemima u realnom životu. STEM-nastava polazi od toga da budućnost nastave ne može biti sadržana u tome da se stvarnost upoznaje preko tuđeg iskustva, odnosno memorisanjem činjenica. Učenik rješava novonastali problem tako što angažira svoja ranija iskustva - ranije usvojeno gradivo. Time se najviše razvija stvaralačko mišljenje učenika, što je glavni cilj ovakve nastave u kojoj je pristup usredotočen na učenika i primjenu naučenog. Trinaest nastavnika naše škole učestvuje u ovom projektu i povezuje matematiku, fiziku, hemiju, biologiju, informatiku i geografiju u okviru redovnih časova i projekata.

U prvom polugodištu školske 2019/20. godine održano je nekoliko časova, projekata i posjeta u okviru STEM-nastave. U nastavku navodimo nekoliko primjera, iako to nisu jedini realizirani časovi, projekti i posjete u toku prva četiri mjeseca ove školske godine.


Učenici II₃ 24. 10. 2019. godine su istražili alkene, te na interesantan i kreativan način predstavili ovu važnu grupu hemijskih spojeva kroz prezentacije, eksperimentalne oglede i pravljenje modela različitih molekula. Inkluzivni pristup ovoj temi bio je od izuzetne važnosti. Naša Edna Šunjić napravila je i pokazala modele različitih hemijskih molekula, te prezentirala dio gradiva.

Povezujući matematiku, fiziku, hemiju i informatiku 19. 12. 2019. godine, učenici III₅ su istražili pojavu harmonijskih oscilacija u realnom životu (od oscilacija molekula i atoma do bungee jumpinga), te su crtali grafike harmonijskih oscilacija poznavajući zakone trigonometrijskih funkcija ili osnova programiranja.

Krajem oktobra učenici IV₆ su, sa profesoricama biologije i hemije, imali niz edukativnih aktivnosti. Jedna od njih je učestvovanje u realizaciji projekta Asocijacije studenata Farmaceutskog fakulteta pod nazivom "Lijekovi sa isteklim rokom trajanja - tihe štetočine". Zanimljiva predavanja bivših učenika naše škole (sada studenata četvrte godine) i radionice o temi zbrinjavanja farmaceutskog otpada su skrenula pažnju na ovu, s više aspekata, značajnu problematiku. Maturanti, prirodnjaci, pokazali su veliko interesovanje jer mnogima od njih to bi moglo biti buduće zanimanje. Učenici istog odjeljenja su, također, posjetili fabriku „Violeta“ u Grudama, jedna je od tri postojeće i taj je pogon izgrađen 2015. godine te u njemu radi oko 150 radnika. Kroz interakciju s učenicima predstavnica firme pojasnila im je proces proizvodnje vlažnih maramica, pelena, deterdženata i drugih proizvoda, te pokazala kojim postupcima i na kojim mašinama se proizvode.

Azra Alagić i Anes Imamović, sa direktoricom škole i profesoricom fizike, posjetili su Makers Faire u Zagrebu. Gotovo 200 sudionika iz Austrije i Italije, do Slovenije, Srbije i Hrvatske predstavilo je radove, projekte i kulturu. U okviru ovog festivala nauke i stvaralaštva, koji se održao 12. i 13. oktobra, posjetioci su mogli vidjeti različite prikaze polaznika nauke i tehnologija, u umjetnosti i zanatu, kao i inovacija i poduzetništva. Jedan od najvažnijih razloga zašto se organizira Makers Faire Zagreb, kao i ostali slični događaji diljem svijeta, jest podizanje svijesti o makers kulturi. Stvaranje je oduvijek bilo dio ljudskog života, a većina ljudi su makeri iako toga nisu svjesni. A na ovom Makers Fairu se zaista imalo šta vidjeti: od kreativnih rješenja za pametne gradove, preko različitih primjena 3D printera i električnih simulatora moždanih stanica, kao i kompjuterskih konstrukcija i robota do cyber/postapokaliptičnog punk nakita.

Sedam naših učenika IV5 (Bihorac Selma, Eminagić Lejla, Kecman Stefani, Kobašević Mirza, Obučina Nermin, Vladavić Salko i Žuga Ernad), u pratnji profesorica fizike, hemije i informatike, proveli su 19. i 20. 11. u Mostaru na STEM-sajmu. Oni su u takmičarskom dijelu sajma predstavili projekat pod nazivom „Djelujmo zajedno za bolje sutra“. U tom



projektu dali su moguća rješenja problema zagađenosti zraka u Sarajevu. Uz takmičenje učenika osnovnih i srednjih škola iz čitave države, učestvovali su i na konferenciji ovog sajma. Tu su imali priliku slušati predavanja mnogih motivacionih govornika koji su postigli međunarodne uspjehe uključujući Andreja Gajića (naučnika, pilota, padobranca, ronioca), Miroslava Šrameka (inženjera u kompaniji Rimac automobila), Adlu Kahrić (istraživačicu na projektu Sharklab National Geographica), Tatjanu Vučić (direktoricu asocijacije Bit Alijansa), Admiru Grelju (istraživača u oblasti fizike u CERN-u), kao i mnoge druge. Naši učenici vratili su se kući bogatiji za jedno novo iskustvo koje će im sigurno pomoći u budućnosti.

Maturanti IV5, u pratnji razrednice profesorice fizike, prisustvovali su konferenciji BH Engineering Week koja je održana 12. decembra u Domu mladih. U sklopu BH Engineering Weeka se održavaju međunarodne konferencije, na kojima uspješni inženjeri i stručnjaci iz različitih polja nauke predstavljaju rješenja za određene i aktuelne probleme, ali se baziraju i na razvoj tehnologije, te olakšavanje i unapređenje naše budućnosti.

Učenici su predstavili STEM-projekat u kojem je fokus bio očuvanje i zaštita naše okoline.

Kao što smo ranije naveli, ovo je samo nekoliko primjera STEM-nastave u Trećoj gimnaziji. Suštinski ciljevi ovog procesa su efektivno usvajanje novih znanja i vještina, razvoj dječije kreativnosti i inovativnosti, te oblikovanje osobnosti učenika. Zbog toga se nadamo da će se u budućnosti naći više vremena i prilika za ovakav način realizacije nastave.



Treća gimnazija nastojala je uvijek biti pokretač u svemu što je dobro za obrazovanje, a uzto i da bude inovativna škola. CEI Step by Step je u 2016. godini pokrenuo inicijativu za dodjelu godišnje nagrade za inovativne odgajatelje i odgajateljice, nastavnike i nastavnice i stručne saradnike i saradnice u predškolskom, osnovnom i srednjem obrazovanju. U svim kategorijama je bilo više od 160 prijavljenih. Početkom decembra informirani smo o tome da je projekat STEM-semafor profesora Mevludina Maličevića ušao u konkurenciju među 10 najinovativnijih primjera rada nastavnika u BiH, što je za nas bila velika čast. Dodjela nagrada bila je 15. 12. 2019. u Narodnom pozorištu Sarajevo. Svi nominovani dobili su prigodne poklone.



Biblioteka bogatija za brojne naslove

Bibliotečki fond naše škole obogaćen je novim naslovima koje smo dobili zahvaljujući sudjelovanju u različitim aktivnostima.

Udruženje „Međunarodni festival književnosti“, koje već četiri godine organizuje Internacionalni festival književnosti Bookstan, realizira projekat „Mladi i književnost“, a podržala ga je Općina Novo Sarajevo.



Sa učenicima I₅ profesorica Amila Huseinbašić u četvrtak, 24. 10, bila je na predavljanju knjige priča Lamije Begagić, koja je govorila i o društvenom angažmanu književnosti, feminističkom osvještavanju mladih kao i o svojim uzorima.

U petak, 1. 11. 2019, profesori Džemaludin Poturović i Abid Zukić sa učenicima IV₅ i IV₃

posjetili su Dječiju kuću i učestvovali na književnoj tribini na kojoj su govorili Nenad Veličković, Lamija Begagić i Đorđe Krajišnik o popularizaciji čitanja kod mladih.

Profesorica Elma Mašnić-Šikalo sa učenicima III₄ prisustvovala je u srijedu, 20. 11, predavljanju autorice Amile Kahrović-Posavljak, a moderirala je Kristina Ljevak.

Zahvaljujemo Zajednici izdavača u BiH koja je uručila vrijednu donaciju našoj biblioteci.



Knjige – najvredniji poklon



Nagorka Idrizović je sarajevska cura od najbolje sorte. Školovala se u rodnom gradu. Bistra, duhovita, vedra i topla, lako je stvarala prijateljstva. Tako je bilo uvijek, od osnovne škole, gimnazijskih dana i tokom pravnih studija. Za nju je novinarstvo bio pravi izbor. Nagrađivana je u školskim danima za svoje briljantne eseje. Već na početku studija postala je član redakcije legendarnih „Naših dana“. Od tada pa narednih pola vijeka ostala je vjerna pisanom novinarstvu, prije svega svom sarajevskom „Oslobođenju“. Lijepog i odnjegovanog stila, pisala je nezaboravne reportaže iz života malog bosanskog čovjeka kao i izvještavala o krupnim društvenim zbivanjima. Veoma obrazovana, bila je cijenjena među čitaocima, kao i među kolegama, čije je poštovanje najteže zadobiti.

Takav bogati životni put bio je oduvijek začinjeno dobrim knjigama. Kupovala ih je, čitala i skupljala, tako da je imala bogatu kućnu biblioteku. Kao bivši učenik Treće gimnazije, dio biblioteke poklonila je svojoj školi, sa željom da generacije mladih imaju mogućnost da dođu do vrijednih književnih dijela i da uče iz njih. Divan i nesebičan gest ove izuzetne žene cijenjen je i prepoznat kao takav i među učenicima i među profesorima ove škole.

Alma Karahasanović, prof. fizike u penziji

Donacija šest računara Vijeća Evrope

Predstavnici Ureda u Sarajevu Vijeća Evrope Trećoj gimnaziji uručili su šest računara koji će itekako pomoći učenicima i profesorima da još kvalitetnije realiziraju nastavu Informatike.

Zahvaljujemo uposlenicima Ureda u Sarajevu Vijeća Evrope na ovoj vrijednoj donaciji.



Uspješan nastavak DKU-a

Nastavljamo realizovati aktivnosti društveno korisnog učenja u novoj školskoj godini.

Iako nam je prošla školska bila prva godina rada na projektu, učenici prvih razreda su već tokom I polugodišta nadmašili minimalan broj sati po učeniku (4 sata učeničkog projekta i 6 sati učešća u grupnim aktivnostima), a do kraja II polugodišta dostigli su broj sati predviđen za četvorogodišnje školovanje. Uradili su brojne društveno korisne i humanitarne akcije, donirali materijalna sredstva, pružali pomoć i podršku drugima, podržavali rad nevladinih organizacija i aktivno učestvovali u radu škole.

Ove školske godine uključuje se još veći broj učenika, drugi razredi nastavljaju aktivnosti, a njima se priključuju i naši najmlađi, učenici prvih razreda. To znači da će u projektu učestvovati 12 odjeljenja, ukupno 284 učenika.

Pedagogica škole Hasija Dedović je održala časove odjeljenske zajednice u prvim razredima i učenicima ukazala na odgojni značaj društveno korisnog učenja, čiji je cilj formiranje društveno odgovornih i aktivnih mladih osoba.



„Jedan slatkiš, jedno dijete“

U skladu sa novogodišnjim praznicima već tradicionalno realizirana je humanitarna akcija „Jedan slatkiš, jedno dijete“. Ova akcija je jedna od konceptnih aktivnosti Mreže savjeta/vijeća učenika Bosne i Hercegovine. Akcija se sastoji u prikupljanju slatkiša u srednjim školama u BiH, nakon čega se prave paketići koji se poklanjaju socijalno ugroženoj djeci i ustanovama čiji su štićenici djeca.

Naša škola se i ove godine odazvala humanitarnoj akciji i učenici su se uključili sa zadovoljstvom. U školi je bila postavljena kutija u koju su se mogli ubaciti slatkiši od 12. 12. do 20. 12. 2019. godine.

U ponedjeljak, 23. 12, učenici I₁ sa predsjednicom Vijeća učenika naše škole pakovali su paketiće za djecu. Napravljeno je 900 paketića na nivou Kantona Sarajevo. Uručeni su mališanima Dječijeg doma „Bjelave“, Zavoda za specijalno obrazovanje i odgoj djece „Mjedena“ i drugoj socijalno ugroženoj djeci.



„Vršnjačko nasilje – NEMA ŠANSE“

Na Dan ljudskih prava, 10. 12. 2019, prezentovali smo projektne aktivnosti čijoj realizaciji su značajan doprinos dali učenici II₆ razrednice Aide Burak. Završnoj manifestaciji projekta „Vršnjačko nasilje - NEMA ŠANSE“ prisustvovalo je oko 100 učenika I razreda. Učenici II₆ su željeli na Dan ljudskih prava ukazati na to da samo eliminacijom nasilja bilo koje vrste i oblika možemo prava u potpunosti ostvariti i biti jednaki u različitostima, te da one ne smiju biti povod za diskriminaciju i posebno ne za vršnjačko nasilje.



Projekt se realizuje od oktobra 2019. s učenicima I, II i III razreda u saradnji s Udruženjem CROA. Podržali su ga MONKS i Općina Novo Sarajevo. Cilj je podizanje svijesti i nivoa znanja učenika, roditelja i nastavnika o štetnosti vršnjačkog nasilja i davanje podrške prevenciji nepoželjnih oblika ponašanja kod učenika. Realizaciju projektne aktivnosti organizovala je Hasija Dedović, pedagogica škole.

Projekt je obuhvatio nekoliko aktivnosti:

- Edukativne radionice za učenike „Krugovi prijateljstva“, koje su održane 29. 10. 2019, za učenike I razreda i 30. 10. za učenike III₁,
- Učeničke lokalne akcije uz slogan „Stop vršnjačkom nasilju“ koje su tokom novembra i decembra realizovali učenici II₆,
- Učenici ovog odjeljenja su pripremili završnu manifestaciju kroz prezentaciju o poznavanju i prevenciji pojava nasilja među učenicima uz interaktivni razgovor s publikom.
- Online kampanja o prevenciji „Cyber nasilje - ne u mojoj školi“ za koju su učenice II₆ Nur Hrenovica i Azra Kusturica napravile film o temi značaja prijateljstva koji je objavljen na stranici Udruženja CROA.
- Jačanje kompetencija roditelja u borbi protiv vršnjačkog nasilja učešćem roditelja na radionici koja je održana na drugoj sjednici Vijeća roditelja 19. 11. 2019. godine, a moderator su bili predstavnici Udruženja CROA.

Nadamo se da će sve ove aktivnosti doprinijeti stvaranju sigurnog školskog okruženja i pozitivne školske klime.

Hasija Dedović, pedagogica



Uspješna saradnja s gimnazijalcima iz Minhena

U utorak, 17. 9. 2019. godine, našu školu posjetili su učenici iz gimnazije Oberhaching iz Minhena. Ovo je samo još jedna u nizu posjeta i uspješnih saradnji koje ostvarujemo sa srednjim školama iz Evrope.

Formalni dio druženja sa gimnazijalcima iz Minhena i njihovom profesoricom bio je upriličen u amfiteatru naše škole. Gimnazijalce su dočekali učenici III₃. Gostima se obratila



direktorica naše škole Senada Salihović, a učenici Durak Belma, Suljević Lamija, Divović Emina, Majstorić Adela i Rožajac Timam predstavili su historiju BiH, Sarajeva te naše škole.

Nakon druženja u amfiteatru gosti su se pridružili času Sporta te smo prošetali Vilsonovim šetalištem.

Merima Pašalić

Foto: Ema Ćatić

Uz osmijeh ponovo ćemo dočekati učenike iz Švedske

U petak, 18. oktobra 2019, našu školu su posjetili učenici iz Westerlundske gimnazije u Enköpingu, Švedska. Njih 11 i njihove profesore Kristinu Hammar, Madeleine Lahti i Dževada Tatarevića ugostili su u amfiteatru profesorica Amila Huseinbašić sa učenicima II₂, te Adinom Čolićem i Emom Selimović. Pričajući sa učenicima iz Švedske, uočili smo mnoge razlike kako u obrazovnim sistemima, tako i u socijalnim normama i prilikama. Razgovarala sam sa nekim od naših gostiju kako bih saznala nešto više o povodu njihovog dolaska u BiH i sedmici koju su ovdje proveli. Kako kažu, Bosna i Hercegovina bila je samo jedna od država na listi mogućih destinacija. Nakon razgovora sa profesorima i učenja o historiji naše države, odlučili su doći ovdje. Kažu, nisu se pokajali.

Održala sam kontakt sa nekoliko naših gostiju i nakon što su se vratili u Švedsku. U razgovoru sa učenicom Muhtabom Nazri saznala sam da su nakon povratka kući dugo sa profesorima razgovarali o putovanju u Bosni. Pitala sam je li Bosna i Hercegovina bila onakva kakvu su očekivali. Rekli su kako su svi vidjeli više toga i uživali mnogo više nego što su očekivali. Kažu, prirodne ljepote Sarajeva i Mostara su ih ponajviše iznenadile, a jedan od omiljenih dijelova puta za većinu učenika bilo je trosatno putovanje do Srebrenice zbog slikovite prirode. Neobično im je bilo vidjeti crkvu, džamiju i sinagogu u istoj čaršiji, tako blizu jedna drugoj. Moj sagovornik priznao je kako

mu se bosanska kafa dopala jer je i u Švedskoj, kao i kod nas, druženje uz kafu važan dio svakog dana. Nikome ko je

odrastao na bosanskoj hrani nije bilo iznenađenje da ih je oduševila. Upoznati ove učenike i njihove profesore bilo je jedno zaista lijepo iskustvo, a posebno mi je drago što je nekolicina naših učenika nastavila druženje sa švedskim gostima. Znam da sam stekla prijatelje koje ću s osmijehom ponovo dočekati u Sarajevu.

Ema Selimović



24. Decembarski dani kulture u Trećoj

I ove godine uspješno su realizirani Decembarski dani kulture. U petak, 6. 12. 2019, publici su se predstavili učenici drugih i četvrtih razreda. Kao i svake godine, publiku je pozdravio veseli hor naše škole pjesmom „Mamma Mia“ predvođen profesoricom Aidom Kamenica. Nakon nastupa hora učenici drugih razreda otvorili su 24. Decembarske dane kulture Treće gimnazije. U obilju kreativnosti, mašte, truda, uzajamnog zalaganja, prvo mjesto odnio je II₅ tačkom pod nazivom „Od Hadžića do granice“. Na jedan veoma osjećajan, duhovit i lijep način poslali su poruku kako nikada ne smijemo imati predrasude prema ljudima te kako ni u kom slučaju ne smijemo ljude karakterizirati prema etiketi kojom su, ni krivi, ni dužni, obilježeni. Predstavljena je aktualna situacija dolaska migranata u Bosnu i Hercegovinu. Autorica teksta Adna Podbićanin ističe: „Na početku školske godine sa profesoricom Amilom Huseinbašić učili smo šta su to predrasude i kako ih izbjeći. Upravo to bila je tema naše predstave. Željeli smo obraditi aktualnu temu o kojoj su ljudi već izgradili mišljenje te ih nasmijati, ali poslali važnu poruku. Nije sve onako kako se na prvi pogled čini, vrijedi svakom čovjeku pružiti ruku.“ Iste večeri, nekoliko sati kasnije, maturanti su se izvanrednim i kreativnim predstavama oprostili od Decembarskih. Pobjednici su, drugu godinu za redom, IV₃ predstavivši se tačkom „Kod Fehre“. Učenica IV₃ Elma Slabić ističe kako upravo ova predstava oslikava društvenu situaciju naše države te da je svaki lik u predstavi predstavljao jedan tip društva. Istakla je kako su ponosni na to što su ovim satiričnim djelom ponijeli i drugi put ovu krunu. Na simpatičan način predstavili su dešavanja u jednoj sarajevskoj ćevabdžinici.

Dok smo nestrpljivo iščekivali rezultate, publiku su zabavljale Plesna sekcija predvođena učenicama Hanom Tahirović i Hanom Hodžić, učenici II₆ Ema Pašić, Iva Amidžić i Ali Jusović uz blok pjesama, Iman Pašić uz pjesmu „Ti možeš sve, al'jedno ne“ u pratnji gitare Edina Bajrića te dobro poznati školski bend „Kontapunkt“. Voditeljice programa bile su Elma Slabić i Nur Hrenovica.

Sedam dana kasnije, 13. 12, opet smo publiku dočekali u amfiteatru i otpočeli drugu noć Decembarskih dana kulture. Nakon pjesama u izvedbi školskog hora, prvačići su nas pozitivno iznenadili izvedbama, a pobijedio je I₄ sa tačkom „115. kongres budućnosti“.



Faris Mekić, učenik ovog razreda, o radu na ovoj predstavi kaže: "U predstavi je ukazano na problem odlaska mladih i kako bi izgledala sjednica u kojoj predstavnici četiriju stranaka pokušavaju da pronađu rješenje tog problema na komičan način. Cilj je bio da se kaže da ne možemo da postignemo dogovor."

Prvo mjesto među odjeljenjima trećih razreda zauzeo je III₄ sa predstavom "Psihijatrija".

"Mi smo prvobitno htjeli da nasmijemo publiku i da se zabavimo na sceni, ali i da prenesemo neku pouku, naš način gledanja današnjih situacija u Bosni. Prvo smo pokušali da pokažemo kako doktori često imaju zvanja (npr. primarijusa) koja nisu zaslužili, te uzimaju zasluge za nešto što nisu ni uradili. Onda, dalje, pokušali smo prikazati kako svi imamo problema, neki malo veće od drugih, ali da smo svi ljudi. Također, ismijavali smo današnje bosanske porodice, kako postoje ljudi koji ne shvataju šta je dobro, a šta loše. I na kraju, aludirali smo na djecu iz Pazarića, i to da se možemo drogirati, piti, udarati žene, vezati djecu, a svakako nećemo odgovarati za to", objašnjava Berin Karahodžić, učenik III₄.

U revijalnom dijelu uživali smo u muzici i plesu. Predstavila nam se opet Plesna sekcija te još jedna plesna grupa predvođena učenicom Ajnom Đapo. Publiku je raspjevala i Lejla Fulurija uz Teu Dedić, koja je svirala gitaru, te Lamija Suljević uz sjajnu izvedbu pjesme. Veče je začinio nastup školskog benda „Kontrapunkt“. Voditeljice programa bile su Lejla Kovač i Emina Karić.

Obje večeri žiri su činili po jedan predstavnik iz Nastavničkog vijeća, Vijeća učenika te Vijeća roditelja. Prve večeri predstavnica žirija bila je Nejla Bihorac, studentica Filozofskog fakulteta Univerziteta u Sarajevu, a druge večeri Alen Konjicija, student Akademije scenskih umjetnosti u Sarajevu.

Svi učesnici manifestacije DDK uljepšali su nam taj dan svojim nastupima. Ovaj projekat ne samo da je zainteresirao prisutne, već je i doprinio druženju učenika pri planiranju nastupa.

Vidimo se opet, do neke naredne prilike!

Ajna Đapo i Hana Salom

Foto: Nađa Osmanagić, Ema Čatić, Izeta Redžepi, Amina Huko, Tajra Osmanagić, Emela Bahtanović, Hena Šehović, Esma Junuzović



Treća gimnazija ETOS-škola

U utorak, 22. 10. 2019, održan je sastanak tima TPO Fondacije i rukovodstva Treće gimnazije na kojem je potpisan Sporazum o saradnji u okviru projekta ETOS-inicijativa. Treća gimnazija je zvanično postala ETOS-škola i nastavit će provoditi aktivnosti promoviranja etičnosti, tolerancije, otvorenosti i solidarnosti. Naša škola već realizuje projekt „Znanjem do razumijevanja“, a prof. dr. Zilka Spahić Šiljak, izvršna direktorica TPO Fondacije, održala je predavanje o ETOS-u kod nas i u svijetu.



Drugi ciklus projekta „Znanjem do razumijevanja“

U prostorijama Treće gimnazije realiziran je drugi ciklus projekta „Znanjem do razumijevanja“ 28. 9. 2019, uz podršku TPO Fondacije i ETOS-inicijative. Sudjelovali su učenici/ce završnih razreda Gimnazije Maarif Koledž, Opće realne gimnazije i Medicinske škole Katoličkog školskog centra „Sv. Josip“ i Treće gimnazije. Radionicama su prisustvovali profesori Selvira Mašnić, Ivan Perić, Senada Salihović i Sedžida Hadžić. Učenicima se predstavio Mirza Rastoder, bivši učenik Treće gimnazije, i upoznao ih o konceptu Home Work. Prvu radionicu je vodila Senada Salihović, direktorica Treće gimnazije. Cilj je bio upoznati i znati razlikovati osnovne elemente zapadnih monoteističkih religija te kritički promišljati. Kroz kreativan rad osnažiti razumijevanje naučenog. Učenici su radili u mješovitim timovima i predstavili radove. Nakon interaktivnog dijela održana je plenarna sesija i pokušalo se odgovoriti na sljedeća pitanja: Što je zajedničko monoteističkim religijama? Trebamo li se u BiH još više međusobno uvažavati? Kome je danas potreban dijalog? Razgovaralo se o rečenici: Iskrena i istinska vjera u Boga ujedinjuje, a ne razdvaja ljude! Osobno pitanje: Kakav je moj odnos prema drugima koji se razlikuju od mene po vjeri i naciji? Trebam li mijenjati svijest o tome ko je moj bližnji?



Što je zajedničko monoteističkim religijama? Trebamo li se u BiH još više međusobno uvažavati? Kome je danas potreban dijalog? Razgovaralo se o rečenici: Iskrena i istinska vjera u Boga ujedinjuje, a ne razdvaja ljude! Osobno pitanje: Kakav je moj odnos prema drugima koji se razlikuju od mene po vjeri i naciji? Trebam li mijenjati svijest o tome ko je moj bližnji?

U drugom dijelu dana učenici su radili na zidu za slobodno izražavanje. Cilj je da što veći broj učenika/ca slikom i tekstem predstave svoje razumijevanje etičnosti, tolerancije, otvorenosti i solidarnosti. Na kraju dana učenici su u grupama radili na scenarijima kojim se promoviraju ETOS-koncepti.

U subotu, 12. 10. 2019, učenici ovih škola učestvovali su u aktivnosti „Sakralno naslijeđe - učionica u srcu Sarajeva“. Obišli smo Sabornu pravoslavnu crkvu i znamenitosti, a o osnovnim elementima pravoslavlja nas je upoznao profesor Ivan Perić. U Katedrali Srca Isusova predavanje za učenike je pripremio don Anto Meštrović. On je govorio o građevini i njenim najzanimljivijim dijelovima i upoznao nas o katoličkoj vjeri.

Uživajući u prelijepom danu, stigli smo do Gazi Husrev-begove džamije, gdje nam je o njenim specifičnostima ali i o islamu govorio Abid Mujkić.

U Crkvi svetog Ante zanimljivo predavanje je održao fra Marinko Pejić. On je govorio o ovom sakralnom objektu i potrebi da budemo otvoreni jedni prema drugima i spremni za dijalog.



Posjetu smo završili u Aškenaškoj sinagogi u kojoj su Sedžida Hadžić i Selvira Mašnić učenike i učenice upoznale o njenom značaju. Pratila nas je ekipa TV Slobodna Evropa koja je intervjuisala učesnike.

U prepunom amfiteatru Treće gimnazije 3. decembra 2019. svim učesnicima su dodijeljene zahvalnice, a nakon formalnog dijela pogledali su izložbu radova koje su učenici naslikali tokom projekta.

16 dana aktivizma: Zahvalnost

Moto ovogodišnje kampanje 16 dana aktivizma je „Zahvalnost“.

Realizovane su radionice s učenicima II razreda s kojima se razgovaralo o temi zahvalnosti. Radionice je održala pedagogica Hasija Dedović. Učenici su govorili o načinima izražavanja zahvalnosti, njene važnosti u međuljudskim odnosima i zahvalnosti kao općeljudskoj vrijednosti. Učenici su učestvovali u razgovoru, a pisanje pisama kao i razmjena posebno su ih obradovali. „Kućice zahvalnosti“, koje smo dobili od TPO Fondacije, postavili smo u kabinete kako bi učenici mogli nastaviti pisanje poruka i pisama zahvalnosti i u narednom periodu.



S britanskim ambasadorom i ministricom pravde o borbi protiv korupcije

Sarajevska Treća gimnazija bila je domaćin diskusije o korupciji u BiH.

Na Međunarodni dan borbe protiv korupcije učenici su razgovarali sa Mattom Fieldom, britanskim ambasadorom u BiH, Lejlom Brčić, ministricom pravde i uprave Kantona Sarajevo, i Berislavom Jurićem, urednikom portala bljesak.info, o korupciji u današnjem bh. društvu, uzrocima ove štetne pojave i načinima prevencije i zaustavljanja.

Veb-portal bljesak.info je pripremio seriju animacija „Obitelj Grabo“ koje na jednostavan i zanimljiv način ukazuju na prisustvo korupcije u svakodnevnom životu, od djetinjstva do starosti. Učenici Treće gimnazije su u njima prepoznali neke od situacija u kojima su se oni, njihovi članovi porodice i prijatelji našli.

“Danas je neki vid kulture i lijepih manira odnijeti doktoru poklon. To nas uči porodica i društvo pa to i ne vidimo kao korupciju.”

“Nakon dugog čekanja na operaciju, tek kada smo platili doktoru, operacija je izvršena.”

“Sa korupcijom smo počeli mi koji smo počeli davati novac, a sad se to očekuje. Mi smo krivi jer nudimo novac.”

“Normalno je da, kad nas zaustavi policija, bez razmišljanja posegnemo za novčanik. Da se lakše izvučemo i prođemo bolje.”

“Mladi žele zaustaviti ovo, ali naši roditelji nastavljaju ovu praksu. Mora se svima ukazivati na loše strane korupcije kako nama mladima, tako i roditeljima.”

Ovo su samo neki od komentara učenika o korupciji i krivcima za ovu pojavu koji su još naglasili da, iako platiti neku uslugu djeluje kao lako i brzo rješenje, niko ne razmišlja o dugoročnim posljedicama, te da od roditelja i odraslih uče da je ovo normalna pojava, da ne postoji povjerenje u državu i njene institucije.



Ministrica Brčić je istakla jačanje ličnog integriteta kod pojedinaca kao suštinski napredak u borbi protiv korupcije. “Svi mehanizmi represije su mali naspram čovjekove odluke da radi pošteno”, rekla je ministrica Brčić.

„Od učenika sarajevske Treće gimnazije čuli smo mnoga svjedočenja o korupciji u njihovoj neposrednoj sredini. Ipak, zadivljuje me njihov stepen informisanosti o štetnosti korupcije po cijelo društvo, o tome ko snosi odgovornost za ovu pojavu, te kako svi zajedno možemo uticati na to da se korupcija smanji. Trebamo ih nastaviti poticati da aktivno djeluju protiv ove pošasti i time spriječiti da i sami postanu dijelom lanca korupcije u budućnosti“, rekao je ambasador Field.

Josh Irby, radujemo se novom susretu!

U našoj školi već nekoliko godina imamo gostujućeg predavača na časovima engleskog jezika, a to je Josh Irby. On živi u Bosni i Hercegovini već 10 godina, a našu školu posjećuje već šest godina, te doprinosi kvaliteti nastave engleskog jezika. Njegove radionice su vrlo zanimljive i korisne ne samo u smislu učenja i usavršavanja engleskog jezika, nego i svakodnevnog života. Radujemo se svakom času sa Joshom!



„Cijenimo književnost“

U II₁, pod rukovodstvom profesorice Edine Lokvančić, 19. 11. 2019. realiziran je projekat Appreciate literature ili Cijenimo književnost. Učenici su pročitali književna djela prema vlastitom izboru, a zatim su pripremili zanimljive aktivnosti za goste. Projekat je realiziran na dva časa, na jednom su bili gosti i interaktivni učesnici učenici IV₁, a na drugom učenici IV₂, oba odjeljenja su jezičko izborno područje. Projekat se nastavlja u februaru i martu 2020. godine kada će učenici posjetiti Američki kutak i Američki referentni centar u sklopu Američke ambasade, gdje će također imati radionice.



DSD II ispiti učenika završnog razreda

DSD-ispiti su međunarodni ispiti za sticanje njemačke jezičke diplome nivoa DSD I (A2/B1) i DSD II (B2/C1) i već niz godina se u našoj školi nudi intenzivna nastava njemačkog jezika u ovom programu, a naši učenici tradicionalno u velikom broju pristupaju DSD-ispitima i uspješno ih polažu.

I ove godine je 27. 11. 2019. realiziran pismeni DSD II ispit, dok su usmeni ispiti realizirani 4. i 5. 12. 2019. pred ispitnom komisijom koju su činili: Thomas Polland, u ime ZfA predsjednik ispitne komisije, te naše profesorice njemačkog jezika Džemilamna Džananović i Sanela Omeragić, ispitivači i članovi komisije. Uživali smo kao ispitna komisija u raznovrsnim temama koje su odabrali učenici, a pružale su priliku da komisija osim postignutog jezičkog nivoa procijeni i sposobnost učenika kritičkog promišljanja i argumentiranja odabrane teme.

Čestitamo na uspješno položenim usmenim ispitima i nadamo se da će nas rezultati pismenih ispita, koji se očekuju u martu, obradovati u istoj mjeri.

Zahvaljujemo profesorima Ameli Zukić-Huseinović i Nedimu Livnjaku, te volonterki fondacije Kulturweit Jasmin Dehn na podršci pri realizaciji pismenog i usmenih ispita.

Aktiv profesora njemačkog jezika



Društveni angažman mladih

U vremenu u kojem živimo poticanje mladih na volontiranje ima višestruku važnost: volontiranjem mladi razvijaju razumijevanje za društvene probleme i suosjećanje s drugima, uče socijalne vještine i razvijaju moralne vrijednosti te volontirajući imaju utjecaj na društvene promjene.

Tema „Društveni angažman mladih“ je motivisala učenike i učenice drugih razreda da sa profesoricom Sanelom Omeragić u sklopu nastave njemačkog jezika volontiraju u Narodnoj kuhinji




Stari Grad, Udruženju „Pomozi.ba“, Crvenom križu, Zavodu „Mjedena“, Udruženju „Dajte nam šansu“, OKI „Fantomi“, Udruženju „Oaza“, Klinici „Svjetlost“, osnovnim školama, vrtićima te u Vatrogasnoj jedinici Stup.

Važno je, također, istaći da se učenici i učenice volontirajući osjećaju korisnima, kvalitetno provode slobodno vrijeme te dobivaju osjećaj zadovoljstva koji proizlazi iz pomaganja drugima zahvaljujući cjeloživotnom učenju.

Kuhati ili ne kuhati?

Učenici drugih razreda su sa profesoricom Sanelom Omeragić na časovima njemačkog jezika obrađivali temu „Kochen oder nicht kochen?“ (Kuhati ili ne kuhati?) i odlučili su pokazati svoje kulinarske vještine. Cilj je bio samostalno pripremiti jelo po izboru, slano ili slatko, te na času prezentirati recept, tj. sastojke i postupak pripreme jela, što je rezultiralo poboljšanjem jezičke kompetencije. Na kraju su učenici uživali u degustaciji ukusnih jela uz pohvale kuharima na odlično pripremljenoj hrani.



Potrošnja i globalizacija

Učenici IV₂ su, uz podršku profesora njemačkog jezika Nedima Livnjaka, uradili projekat „Produkte aus D-A-CH“ (Proizvodi iz Njemačke – Austrije - Švicarske). Projekat su proveli u okviru teme „Konsum und Globalisierung“ koja se obrađivala na časovima. Učenici su u manjim grupama šetali po Sarajevu sa zadatkom da pronađu i fotografišu što više proizvoda/predmeta koji dolaze iz zemalja njemačkog govornog područja. Svaka grupa je imala zasebnu oblast na koju se fokusirala. Cilj projekta je bio jačanje osjećaja za interkulturalnost kao i jačanje svijesti o ulozi zemalja njemačkog govornog područja i njemačkog jezika u našoj zemlji. Ciljevi su postignuti, učenici su se zabavili i prezentirali rezultate istraživanja.



Das Tagebuch der Anne Frank: Graphic Diary

Iako je od vremena Drugog svjetskog rata prošlo više od sedamdeset godina, djelo „Dnevnik Ane Frank“ adaptirano kao grafički roman, uz moralne vrijednosti i odgojne poruke, pomaže vratiti tužno sjećanje na sva stradanja i probleme koje rat donosi, ali i obrazovati učenike u svrhu boljeg čovjeka i boljeg svijeta, što i jeste bio cilj projektne nastave „Das Tagebuch der Anne Frank“ - Graphic Diary. Učenici DSD-programa trećih razreda su od 1. 10. do 1. 11. 2019. sa Thomasom Pollandom, stručnim savjetnikom njemačke Centrale za školstvo u inostranstvu, i profesoricom Sanelom Omeragić imali priliku aktivnim učestvovanjem steći kompetencije kako razvijati kritički stav, kako produbiti određena znanja i povezivati ih u koherentnu cjelinu, a ne samo ostati na nivou činjeničnog znanja.



Učenici su bili svjesni odgovornosti i povjerenja koje im je dato da sami istražuju, otkrivaju, povezuju i prezentiraju sadržaje na njemačkom jeziku te su stekli više sigurnosti i samopouzdanja što je veoma važno za njihov napredak.

Projektna nastava je završila posjetom Muzeju Jevreja.

Sanela Omeragić, profesorica



Njemački naučnici koji su promijenili svijet

Naši učenici I₄, I₅ i I₆ imat će priliku da budu dio zanimljivog projekta koji, uz saglasnost nadležnog ministarstva, provodi Udruženje „Nauka i svijet“ uz podršku Ambasade Savezne Republike Njemačke u Sarajevu, a pod nazivom „Njemački naučnici koji su promijenili svijet“.

Uprava škole i profesorice njemačkog jezika rado su se odazvale pozivu za učestvovanje u ovom projektu i raduje nas što ćemo pružiti priliku učenicima da upoznaju značajno naučno naslijeđe koje su nam ostavili njemački naučnici, prodube postojeća i steknu nova znanja, razvijaju intelektualnu znatiželju, a i da istovremeno kao učenici njemačkog jezika i DSD-programa razvijaju interkulturalnu kompetenciju.

U prvoj fazi projekta 17. 10. 2019. posjetila nas je Jelena Kalinić, novinarka i kreatorica projekta, te prezentirala serijal videa o najznačajnijim njemačkim naučnicima, koje je snimila uz podršku Ambasade Njemačke. Profesorice njemačkog jezika Džemilamna Džananović i Amela Huseinović-Zukić pripremit će i sa učenicima realizirati školsko takmičenje na kojem ćemo odabrati ekipu koja će nas, nadamo se, uspješno predstavljati na završnom takmičenju u EU Info Centru.



Halloween zabava za DSD-ovce

U utorak, 29. 10. 2019, u 19 sati, u amfiteatru Treće gimnazije je organizirana Halloween zabava na njemačkom jeziku, namijenjena učenicama i učenicima prvih i drugih razreda koji pohađaju DSD-program. Oni su se zajedno s profesorom i profesoricama njemačkog jezika zabavili uz razne sadržaje i njemačku muziku, ali su i usavršavali usmenu konverzaciju kroz interaktivne zadatke i igrice. Svi sadržaji su bili prilagođeni tematici, pa su se učenici maskirali. Na kraju zabave učenici su u timovima tražili sakrivenu bundevu. Pobjednicima, kao i onima koji su imali najbolje kostime, dodijeljene su nagrade. Zahvaljujemo svima na učestvovanju, a našim profesoricama i profesoru na organizaciji.



Dramska sekcija sa „Okvirom za sliku“ rasplakala publiku

U srijedu, 27. novembra 2019, po prvi put u ovoj školskoj godini Dramska sekcija, sa profesoricom Amilom Huseinbašić na čelu, priredila je izvrsnu predstavu pod nazivom „Okvir za sliku“. Predstava je koncipirana tako da su članovi sekcije nasumično podijeljeni u četiri grupe kako bi novi i stari članovi radili zajedno i napravili nešto novo i originalno. Svaka grupa je drukčije shvatila temu, što je donijelo nevjerovatnu reakciju publike, od smijeha do suza, vidjeli smo sve.

Publiku su prvi pozdravili Aida Hot, Omar Kulenović, Matea Mitrović, Amina Begić, Namik Jamak, Širin Biščević i Emina Alagić komedijom o sinu preminulog direktora firme koji naslijeđenu titulu zlopotrebljava i nesvjesno uništava očevo nasljedstvo.

Nakon toga pogledali smo potpuno drukčije obrađenu temu. Naime, grupa u sastavu Ema Selimović, Adna Boračić, Nejra Ajdinović, Sumeja Čoko, Lejla Smječanin i Sara Palo, predstavila nam je tužnu priču jedne porodice nakon što je njihov muž, sin, otac, brat, poginuo u saobraćajnoj nesreći.

Smijeh je najbolji lijek, pa su publiku tako pokušali „izliječiti“ još jednom komedijom. Najkreativnija grupa: Adla Veljović, Amila Aginčić, Nur Hrenovica, Delila Subašić, Berina Juković i Berin Karahodžić, oduševila je publiku pričom o likovima u jednoj neobičnoj slici. Naime, najstariji među njima, konobar koji ih služi više od 100 godina, odlučio je napokon da im kaže da ako se okvir u kojoj slika stoji razbije, oni će iz nje ispasti i nakon toga imati samo jedan dan da žive kao normalni ljudi. Nakon toga vratit će se u sliku i nikad više neće moći uživati u razgovoru i pokretima kad god ih

trenutni vlasnik ne gleda. To je upravo ono što se i desi nakon nezgode uzrokovane pretjeranim kihanjem. Iako su taj jedan dan proveli odvojivši se jedni od drugih, na kraju, ipak, priznaju da vole jedni druge i da će im ovakvi razgovori zaista nedostajati.



„Šećer za kraj“ ovog događaja ostavio nas je sa suzama u očima i gorkim ukusom u ustima jer su Ajna Đapo, Adna Podbičanin, Merima Glušac, Orhan Berberović, Lana Šmit i Farah Ganović priredili priču o dvjema sestrama u ratnoj Bosni koje pokušavaju pobjeći iz zatočeništva. Pet godina poslije starija sestra čita pismo koje joj je mlađa ostavila u starom okviru u slučaju da ne preživi rat.

Iako nas je finale događaja dovelo do suza, ogromni aplauz je ispratio sve glumce Treće gimnazije. Sa zadovoljstvom možemo reći da su se i najmlađi učenici prvi put okušali na sceni nastupajući kao da su godinama dio ovog nevjerovatnog tima.

Ema Selimović

„Veče sa teatarskim i filmskim umjetnicima“

Ja sam Ajna Đapo. Učenica sam II₃. Ne krijem oduševljenje i zainteresiranost prema glumi, filmu i teatru te uvijek ponosno ističem kako veoma želim da to bude moj životni poziv. U želji da poboljšam kontakt mladih ljudi sa umjetnošću filma i teatra, organizirala sam „Veče sa teatarskim i filmskim umjetnicima“. Dok se kišovita večer spuštala na Sarajevo, mi



smo uživali u predivnoj atmosferi prepunog amfiteatra u ponedjeljak, 2. 12. 2019. godine. Gosti su bili uspješna, priznata, neponovljiva glumica Tatjana Šojić te mladi, perspektivni i talentirani glumac Mak Čengić koji je prve glumačke korake napravio na našoj sceni, kao učenik Treće gimnazije, prilikom predstavljanja svog razreda na Decembarskim danima kulture. Imala sam tu čast i zadovoljstvo razgovarati s njima. Gosti su nam pričali anegdote i zanimljive događaje iz vremena srednjoškolskih dana. Prisjetili su se i presudnog momenta kada su odlučili studirati na Akademiji scenskih umjetnosti. Razgovarali smo, također, o važnosti umjetnosti, značaju za mlade ljude, koliko im je bliska i koliko su oni bliski njoj. Spomenuli smo i Festival bajke za djecu i odrasle te uz Tatjanu Šojić, jednu od organizatora, istakli važnost bajke u obrazovanju i odgoju. Mak Čengić je s nama podijelio šta je to što je najviše naučio od iskusnijih kolega te kako nakon velikog broja teatarskih uloga jedva čeka priliku da zaigra u filmu. Spomenuli smo i važnost filma u životu ljudi

i različitu percepciju prikaza djela u teatru i na filmskom platnu. Glumci su s nama podijelili iskustva te istakli važnost čitanja knjiga raznih žanrova. Govorili smo i o nekim problemima novih generacija te ponudili način njihovog rješavanja. Ovo je bila noć kreativnosti, ljepote, umjetnosti, nadahnuća, noć iz snova koja je u više navrata podsjećala na pozorišnu predstavu. Na kraju je direktorica uručila zahvalnice našim gostima. Hvala svim znatiželjnim učenicima i drugim gostima koji su ovo veče učinili čarobnim. Hvala i glumcima što su usred naporne sezone izdvojili vrijeme i podijelili iskustvo. Nadam se da ćemo zajedničkim snagama mi mladi naučiti slijediti modele pravih vrijednosti, poštivati kulturu i umjetnost te uvijek u njoj pronaći ljepotu. I kako Tatjana Šojić reče: „Učite, čitajte i nikad ne odustajte. Sve propušteno znanje iz srednje škole kad-tad će vas u životu, negdje, sačekati.“



Poetski predah

U ponedjeljak, 30. 12. 2019. godine, članovi Recitatorske sekcije pod vodstvom profesorice Elme Mašnić-Šikalo realizirali su projekat pod nazivom "Poetski predah". Članovi sekcije, učenici trećih i četvrtih razreda, svojim nastupom približili su nam poeziju velikih pjesnika 20. vijeka: Konstantina Simonova, Žaka Prevera, Sergeja Jesenjina, Federika Garsije Lorke i Pabla Nerude.

Pjesme koje su recitali su motivirane općeljudskim vrijednostima, kao što su ljubav, odanost, prijateljstvo, sloboda i jednakost za sve ljude.

Osim što smo uživali u divnim recitacijama, na sceni smo mogli vidjeti mnogo toga, kao da smo se vratili u prošlost. Svaka pjesma bila je popraćena pričom o uvjetima njenog nastanka i tako je postala bliža i zanimljivija gledateljima.

Recitali su bili popraćeni glumom, plesom, muzikom, videoprezentacijama, zanimljivim kostimima i scenografijom. Nastup su uljepšale Iman Pašić, koja je svirala klavir i pjevala rusku narodnu pjesmu „Oči čornije“, i Taida Hodo, koja je svirala violinu.

Recitatori su se, zaista, potrudili da kraj 2019. pamtimo po njihovom nastupu koji je prevazišao svaki do sada.

Lejla Fulurija



Night Party

Humanitarni koncert "Night Party" održan je četvrtak, 26. 9. 2019. godine. Cilj koncerta bio je prikupiti pomoć za oboljelog Fuada Mahmutovića i kreiranje prostora za druženje među generacijama. Organizatori projekta su Ajdin Sofić i Ajdin Sadžak. Učenici su uživali u dva sata fenomenalnog provoda.



Sretan 17. rođendan!

Edna Šunjić, učenica drugog razreda naše škole, izrazila je želju da 17. rođendan proslavi u školi sa drugarima. Edni smo ispunili želju u petak, 8. novembra. Rođendan je proslavljen u divnoj atmosferi ispunjenoj osmijesima, plesom i muzikom.

Edna je zahvalila svima koji su uveličali njen rođendan i omogućili da se ostvari još jedan njen san. Još jednom čestitamo Edni rođendan i želimo sve najljepše!



Naši učenici budući alpinisti

Ova je generacija odjeljenja prvih razreda u okviru društveno korisnog učenja prisustvovala upoznavanju teoretskih osnova alpinizma u saradnji sa instruktorima Sarajevske škole alpinizma. Presentacija je trajala dva školska časa, a nakon ovoga uslijedila je i praktična obuka boulderinga na vještačkoj stijeni u školskoj sportskoj sali.

Bouldering je penjanje na vještačkim stijenama do visine 5 metara i predstavlja odličnu pripremu u tehničkom i kondicionom smislu za alpinizam.

Alpinizam je penjanje po neoznačenim i neosiguranim stijenama (ljeti i zimi), poznatim i nepoznatim putanjama - alpinističkim usponima (smjerovima), pri čemu se za osiguravanje i napredovanje upotrebljava alpinistička oprema i tehnika.



Pobjeda u prijateljskoj utakmici

Tradicionalna prijateljska košarkaška utakmica sa učenicima Gazi Husrev-begove medrese održava se svakog oktobra. U fer i odličnoj atmosferi naša ekipa pobijedila je rezultatom 122:91. Čestitamo našim momcima: Farisu Đipu, Adinu Čoliću, Faruku Eminoviću, Amaru Eminoviću, Omaru Bašiću,

Orhanu Berberoviću, Berinu Karahodžiću, Ismailu Pašaliću, Mirzi Junuzoviću, Adiju Zebi, Omaru Kulenoviću, Benjaminu Jonesu, Kenanu Dizdareviću, kao i profesoru Ademu Bajriću.



Najveća lekcija na svijetu u Trećoj gimnaziji

Kampanja za promociju Globalnih ciljeva UN-a i UNICEF-a pokrenuli su početkom septembra Najveću lekciju na svijetu, kao inicijativu za upoznavanje djece iz više od 100 zemalja o novim ciljevima održivog razvoja i budućnosti Generalne skupštine UN-a.

Najveća lekcija na svijetu se prvi put u 2019. godini provodila u Bosni i Hercegovini i prepoznajući važnost ovakvog projekta naša škola je odmah uzela učešće. Projekat „Najveća lekcija na svijetu u Trećoj gimnaziji“ zamišljen je kao niz interaktivnih radionica i edukacija za učenike od II do IV razreda. Učenici su se upoznati o ciljevima globalnog održivog razvoja iz oblasti zdravlja, ekologije i ekonomije koristeći UNICEF-ove nastavne pripreme i materijale.

Pedagogica škole Hasija Dedović i učenici IV₃ Elma Slabić, Malik Kahvedžić i Haris Begić tokom oktobra i novembra realizovali su radionice za učenike i predstavili lekcije u vezi sa Globalnim ciljevima. Projekt je baziran na takmičarskim aktivnostima učenika u pronalaženju najboljih projektnih ideja i rješenja u oblasti zdravlja, ekologije, ljudskih prava i ekonomije, a u cilju razvijanja i jačanja odgovornog ponašanja, aktivizma i volontiranja mladih kao preduvjeta za unapređenje kvalitete života.

Centralna svečanost, takmičenje, kojim smo zatvorili projekat, održana je 26. 11. 2019. u amfiteatru škole. Dvadeset učenika iz različitih odjeljenja su predstavili rješenja zadatka: „Kako riješiti problem zagađenja vodenih masa?“. Kreativne ideje predstavili su na „pitchingu“ pred stručnim žirijem (pedagogica škole Hasija Dedović, profesorica fizike Alisa Ramić, predstavnik u ime MUNJA inkubatora društvenih inovacija Meris Borović i učenica IV razreda članica PR tima Grada Sarajeva Elma Slabić) i učenicima. Titulu pobjednika na takmičenju povodom Najveće svjetske lekcije osvojile su Dalila Bublin, Hana Granulo, Džejna Fehrić i Selma Salman. Njihova ideja je postavljanje UV lampi koje ubijaju bakterije na otvore za kanalizaciju na rijeci Miljackoj. Ovaj projekat održiv je i primjenjiv i na ostalim rijekama. Učenicama zahvaljujemo na učestvovanju, a pobjednicama želimo realiziranje projektne ideje.

Hasija Dedović i Elma Slabić



Podjela paketića

Nova godina i zimske čarolije su se bližile pa smo, uz dogovor sa profesoricom Amilom Huseinbašić, odlučili pripremiti priredbu. Radeći na predstavi došli smo na ideju organiziranja radionica kojima smo željeli potaknuti maštu i kreativnost najmlađih. Ukrašavanje amfiteatra, postavljanje radionica i uvježbavanje predstave predstavljalo nam je zadovoljstvo. Atmosfera je bila



magična dok smo svi pjevali i plesali uz novogodišnje pjesme. Sav uloženi trud se isplatio kada smo vidjeli osmijehe na dječijim licima dok crtaju, prave čestitke i jedu slatkiše. Zatim je uslijedila predstava o vilenjacima i Djeda Mrazu, a onda i podjela paketića. Uz trud svih učenika I₅ i pomoć profesorice Amile, pokazali smo da se timski rad uvijek isplati.

Irma Babić i Nela Džindo

Treće mjesto na Noći istraživača 2019.

I ove godine se naša gimnazija predstavila na Noći istraživača i osvojila treće mjesto za najinovativniji štand. Uz Sarajevo, istovremeno i drugim evropskim gradovima realizirana je ova zanimljiva manifestacija.

Naši su učenici pokazali projekte na kojima su radili u sklopu STEM-nastave, te prisutnima pokazali svoje znanje i vještine u poljima robotike i hemije.

Azra Alagić i Anes Imamović, uz mentorstvo profesorica Alise Ramić i Aide

Ražanice, programirali su nekoliko robota od lego kockica, kojima su prisutni mogli pokušati upravljati.

Učenice Asija Boračić i Naila Džananović su prisutnima pokazale sistem rada modernih rollercoastera.



Profesorica Edina Hodžić je sa Dalilom Lokvančić, Farah Osmanović te bivšom učenicom Treće gimnazije Aminom Huko pripremila tri interesantna eksperimenta: nezapaljiva krpa, vulkan, te Aminin potpisni eksperiment – paljenje ruke.

Projekat Semafor prezentirali su učenici u pratnji profesora Mevludina Maličevića.

Zahvaljujemo učenicima i profesorima koji su učestvovali u Noći istraživača. Posebnu zahvalnicu upućujemo Save the Childrenu za izuzetnu podršku koju nam pružaju!

Emma Selimović



Nagrade za najbolji scenarij i najbolji film

Na ovogodišnjem devetom Izvor film festivalu, u organizaciji Izvor centra, tradicionalno takmičila se i naša škola. Učenice četvrtog razreda Ajša Osmanović i Arijana Vereget potpisuju scenarij i režiju kratkog filma „Drugi dio mene“ sa kojim su učestvovalе u takmičarskom dijelu festivala. Svake godine na festivalu naša



škola osvoji neku od vrijednih nagrada, a ove godine dobitnici smo nagrada za najbolji scenarij i najbolji film. U filmu su glumile i naše učenice Una Mazrak i Ajna Đapo.

Drugo i treće mjesto na Sketch Street Basketballu

Od 14. do 16. septembra 2019. održan je turnir „Sketch Street Basketball“ na platou ispred BBI centra. Našu školu su predstavljale tri ekipe u dvjema kategorijama. U kategoriji



do drugog razreda ekipa u sastavu: Amar Eminović, Adi Zeba, Benjamin Jones i Omar Kulenović osvojila je drugo mjesto. U kategoriji do četvrtog razreda utakmicu za treće i četvrto mjesto odigrale su dvije



naše ekipe predvođene kapitenima Orhanom Berberovićem, u sastavu:



Berin Karahodžić, Mirza Junuzović i Ismail Pašić, te Farisom Đipom, u sastavu: Adin Čolić, Omar Bašić, Faruk Eminović. Nakon velike borbe i neizvjesnog rezultata pobijedila je ekipa Farisa Đipa rezultatom 14:12 i osvojila treće mjesto.

*Tekst i foto: Tajra Osmanagić
Nađa Osmanagić*

Trčim za inkluziju

Udruženje "Život sa Down sindromom FBiH" 15. septembra 2019. godine prvi put je organizovalo kampanju "Trčim za inkluziju – da niko ne bude izostavljen". Cilj ove kampanje je podizanje svijesti javnosti o poštivanju prava djece i mladih sa Down sindromom na inkluzivno obrazovanje, kao i osiguravanje finansijskih sredstava za programe i aktivnosti koje Udruženje "Život sa Down sindromom FBiH" provodi za djecu i mlade.



„Riječ je o jednom jako lijepom prazniku trčanja i zdravog života u Sarajevu. Trinaest godina zaredom Udruženje nam omogućava trčanje i zdrave životne prakse. Veoma smo zadovoljni odzivom. Imamo nekoliko hiljada trkača iz više od 40 zemalja širom svijeta. Dolaze zaista sa svih strana i iz svih gradova BiH. Zastupljene su sve starosne skupine i trkača i publike. Sretni smo jer je dobra atmosfera i lijepe i zdrave poruke šaljemo u svijet iz Sarajeva. Stalo nam je da se što više dobrog čuje i vidi o nama“, kazao je Erol Mujanović iz Udruženja „Maraton Sarajevo“.

Veliki doprinos projektu dala je učenica Treće gimnazije sa Down sindromom Edna Šunjić, koja sve učenike inspiriše da svaki dan budu bolji, da napreduju, te dokazuje da je u životu sve moguće samo ako se želi.





Naših 60 učenika i četiri profesora učestvovali su u utrci kao trkači, a 114 kao volonteri. Trkači su svoje istrčane kilometre prodavali i taj novac donirali organizaciji "Trčim za inkluziju - da niko ne bude izostavljen".



Potpisan Sporazum o saradnji sa Specijalnom olimpijadom BiH

Direktorica Treće gimnazije Senada Salihović 3. 10. 2019. godine potpisala je Sporazum o saradnji s direktoricom Specijalne olimpijade BiH Kadom Delić-Selimović.

Naša Edna Šunjić je itekako utjecala na mijenjanje svijesti i spoznaje učenika i članova kolektiva i zahvaljujući uspješnoj saradnji Edne i njene porodice sa školom, uslijedilo je potpisivanje Sporazuma o saradnji.

Zahvaljujući našim učenicima, profesorima i članovima Uprave, koji su kontinuirano uključeni u različite projekte u vezi sa inkluzijom, bilo da je riječ o učestvovanju ili volonterskom radu, dokazali smo da smo uspješni saradnici.

Zana Kapetanović



Zlatna Edna!

Odmah nakon potpisivanja Sporazuma o saradnji između Treće gimnazije i Specijalne olimpijade Bosne i Hercegovine, nastavili smo već ranije započete zajedničke aktivnosti.

Od 3. do 6. oktobra održane su Sportske igre Oaze na više lokacija u gradu u plivanju, stonom tenisu, atletici, boćanju, košarci, kuglanju, nogometu i MATP-u (Program za osobe sa višestrukim invaliditetom) u organizaciji Udruženja Oaza. U individualnim i ekipnim sportovima učestvovala su 473 takmičara iz Slovenije, Srbije, Makedonije,

Hrvatske i Bosne i Hercegovine.

Učenici naše škole pomagali su kao sudije, asistenti, navijači, hostese u defileu ekipa i kao članovi ekipa inkluzivnog futsala.

Naša kraljica Edna i ovoga je puta, u prilično



jakoj konkurenciji, osvojila zlatnu medalju u plivanju slobodnim stilom na 25 m i zlatnu medalju u stonom tenisu.

Edna, ti si naš ponos! Čestitamo ti na još jednom izuzetnom uspjehu i radujemo se svakom sljedećem, a bit će ih sigurno još mnogo.

Svim našim učenicima, volonterima i učesnicima Sportskih igara Oaze zahvaljujemo na plemenitosti, ljudskosti i reprezentativnom predstavljanju Treće gimnazije. Čestitamo vam na spremnosti da u svakoj prilici podržite Ednu i sve naše zajedničke aktivnosti!



Pošumljavanje Velikog polja

Krajem oktobra dvadeset i pet učenika naše škole (odjeljenja IV₆, IV₃, I₂ i I₃), sa profesoricom biologije Almom Gibović, učestvovali su u ekoprojektu pošumljavanja Velikog polja na Igmanu. Druženje sa učenicima drugih škola, studentima PMF-a i zajednički rad u grupama su odlike ovakvih ekoaktivnosti.



Bili smo na najvećem domaćem forumu inovacija, tehnologije i poduzetništva



Učenici trećeg razreda (IT smjer) i četvrtog razreda (društveni smjer), u pratnji profesorice informatike Vesne Radović i zamjenice direktorice Amre Čolić, prisustvovali su najvećem domaćem forumu inovacija, tehnologije i poduzetništva Sarajevo Unlimited od 22. 10. do 24. 10. 2019, u hotelu Holiday u Sarajevu. Učenici su imali priliku da čuju i vide svjetske trendove u ovoj oblasti, upoznaju se sa mladim poduzetnicima, sudjeluju u radionicama 3D printing. Teme su iz različitih oblasti od fenomena smart citya, digitalizacije u turizmu, te IT start up scene. Nadamo se da ćemo i u budućnosti biti u prilici da sa našim učenicima posjetimo slične događaje jer je to način stjecanja novih znanja i vide primjenu onoga što uče u učionicama.



Zlatni pehar sa Atletskog kupa srednjih škola

Naša škola se ponovo pokazala najboljom i donijela zlatni pehar sa Atletskog kupa srednjih škola Kantona Sarajevo, nivo Općina Novo Sarajevo. Atletski kup je održan u četvrtak, 3. oktobra na Atletskom stadionu Koševo.

Prvo mjesto za našu školu u trčanju na 100 m su osvojili Amila Bećirbegović i Faris Delić, dok je najbolje vrijeme na 400 m imao Tarik Mahalija. Lamija Imamović je u svojoj konkurenciji bila prva na 600 m, dok je Faris Đip ubjedljivo bio najbrži na 1000 m. Prvo mjesto u skoku u dalj je osvojila naša Lejla Fulurija, a muška i ženska štafeta (4x100 m) su također donijele zlato.



Odlične rezultate su postigli Emina Alagić i Amar Grizović zauzevši treće mjesto u trci na 100 m, kao i Tarik Gondžo u trčanju na 1000 m.



Visoko drugo mjesto u trčanju na 400 m su osvojili Iman Agić i Ali Boudellaa. Zerina Velić i Ajdin Dervić su donijeli srebro u skoku u dalj, a naša Amina Dudo je također osvojila drugo mjesto u bacanju kugle.



U četvrtak, 17. 10. 2019. godine, održano je finale Atletskog kupa srednjih škola Kantona Sarajevo. Kao i svake godine, učenici naše škole su postigli izvanredne rezultate.





Naša škola je u konačnom poretku svih srednjih škola koje su učestvovala, osvojila prvo mjesto. Dokazali ste da se uz trud, zalaganje i dobru volju sve može postići. Čestitamo našim učenicima, kao i profesoru Ademu Bajriću na postignutim rezultatima.

Lamija Imamović

Ekipe sastavljena od 11 najboljih atletičara Treće gimnazije se vrijedno pripremala za takmičenje. Najbolje rezultate za našu školu su postigli sljedeći učenici:

- Amila Bećirbegović, osvojivši drugo mjesto u trčanju na 100 m;
- Lejla Fulurija, treće mjesto u skoku u dalj;
- Lamija Imamović, drugo mjesto na 600 m;
- Faris Đip, drugo mjesto na 1000 m;
- Ženska štafeta (4×100 m) u sastavu: Amila Bećirbegović, Iman Agić, Širin Bišćević i Sara Ažman je također osvojila drugo mjesto.



„Znanjem protiv droge“

U okviru projekta „Znanjem protiv droge“, koji realizira Udruga za psihosocijalnu promociju i pozitivnu afirmaciju humanih vrijednosti „Momentum“ uz podršku Općine Novo Sarajevo, u amfiteatru škole održana su predavanja o štetnosti opojnih droga. Cilj projekta je jačanje svijesti mladih o štetnosti



upotrebe droga, prevencija, kao i odgovornosti prilikom donošenja odluka. Doktor Alem Ćesir, neuropsihijatar iz KCUS-a, učenicima drugih razreda održao je zanimljiva predavanja kojima su prisustvovali i predstavnice Službe za obrazovanje, kulturu i sport Općine Novo Sarajevo.

Prvo radno iskustvo naših učenika

Naši učenici su 18. 10. 2019. učestvovali na Socijalnom danu u organizaciji Asocijacije srednjoškolaca u BiH. Socijalni dan je projekat koji srednjoškolcima, na jedan dan, daje priliku da zamijene školske klupe radnim mjestima. Na ovaj način srednjoškolci stječu prvo radno iskustvo, pruža im se prilika da teorijsko znanje primijene u praksi, ali i mogućnost donošenja odluke o budućem zanimanju. Deset učenika trećih i četvrtih razreda je bilo na radnim mjestima u firmama: ProMENTE, Homework hub, McCANN, Univerzitet u Sarajevu, Zemaljski muzej, UG Zašto Ne, organizaciji SHL i IUS.

Gimnazijalci su stekli pozitivna iskustva, naučili nešto novo i korisno te imali priliku preuzeti odgovornost u vezi sa budućnosti.



Darujmo krv – spasimo život!

Treća gimnazija tradicionalno učestvuje u humanitarnoj akciji dobrovoljnog darivanja krvi u okviru Programa obezbjeđivanja krvi za povrijeđene i oboljele u FBiH u saradnji sa Zavodom za transfuzijsku medicinu FBiH. Naši maturanti su se i ove godine priključili ovoj humanoj akciji. Svi učesnici dobili su donorske kartice i time postali članovi.

Hvala vam na humanosti!



Najbolji nastup hora na Danima Matice hrvatske

Glazbena večer sarajevskih gimnazija održana je 12. 11. 2019. u Domu OSBiH, a učenici Muzičke sekcije naše škole su nastupili sa dvjema pjesmama. Ove godine Matica hrvatska obilježava 140 godina postojanja. Tim povodom održan je koncert sarajevskih gimnazijalaca: Bošnjačke gimnazije, „Obale“, Prve gimnazije, Druge gimnazije, Četvrte gimnazije i KŠC-a. Dirigenti horova su se potrudili da što bolje pripreme učenike za koncert u šta smo se i mi uvjerali. Mi smo uvijekzabili dvije kompozicije: tradicionalnu/narodnu „Jovano, Jovanke“ i dalmatinsku pjesmu „Vela Luka“. Naša interpretacija ljupkih harmonija je oduševila prisutnu publiku, gromoglasni aplauzi su dokaz da smo bili najbolji. Također, učenici su oduševljeni nastupom i slatkim trenutkom koji im je podarila naša direktorica Senada Salihović. Zahvalni smo na njenoj podršci i podršci svih profesora naše Treće gimnazije.

Ovo je bio samo jedan u nizu od izvanrednih nastupa Muzičke sekcije i radujemo se svim novim prilikama koje će uljepšati svojim prisustvom.

Tea Dedić i Ejla Sadiković



Treće mjesto osvojila pjesma „Tama“

U zgradi Općine Novi Grad 29. 11. 2019. obilježeni su Dani Matice hrvatske biranjem najboljih literarnih radova sarajevskih srednjoškolaca. Ova značajna kulturna manifestacija organizira se već dugi niz godina. Dani Matice hrvatske sastoje se od tri segmenta od kojih je jedan biranje najboljih literarnih radova učenika srednjih škola. Kao i prethodnih godina, i ove su naši učenici konkurisali i postigli značajne rezultate. Elma Slabić, učenica IV₃, osvojila je treće mjesto u konkurenciji poetskih radova sa pjesmom „Tama“.

Čestitamo Elmi i ostalim učenicima čiji su se radovi našli u ovogodišnjem izdanju Zbornika Matice hrvatske.

Merjem Gutošić



Tama

Kakvo je to čovjek biće,
da postaje dželat svoje duše?
Zar je moguće da srce
što ledom bijaše okovano
izgori u vlastitoj vatri?
Čija je to noć svjetlija
nego nečije sunčane zore?
Ko je onaj, čije ime leži na usnama,
onaj što ga naziva padišahom duše?
Zašto osjeća dodir koji ne postoji
i čezne za onim tantalskim?
Kada se u zimu pretvorilo
nadolazeće proljeće?
Zar je i ovaj put moguće
da je noć crna,
a osvanula, a tamnija
nó što je ikad bila?

Elma Slabić

Posjeta Potočarima

U srijedu, 2. 10. 2019, učenici drugih razreda u pratnji razrednika i voditeljice puta profesorice Emire Hubjer posjetili su Memorijalni centar Potočari. Najprije smo obišli mezarje u kojem su smiraj našle 6.643 žrtve i prisustvovali historijskom času koji je održao Hasan Hasanović, kustos u Memorijalnom centru Potočari. Govorio je o potresnim i bolnim pričama kojima je svjedočio i golgoti koju je preživio narod Podrinja. Potom smo se uputili u nekadašnju Fabriku akumulatora a danas Spomen-sobu Srebrenica. Zatim smo pogledali kratkometražni dokumentarni film o stravičnom genocidu u Srebrenici, te obišli Muzej.



U popodnevним satima krenuli smo put Sarajeva. Ponosni smo što smo imali priliku posjetiti Potočare i odati počast stradalima u genocidu.




Ajna Đapo

Foto: Amel Jašarević, Hana Lučkin, Emela Bahtanović, Tea Dedić

Druženje na jesenjem školskom izletu učenika

U petak, 27. septembra 2019, učenici Treće gimnazije su u pratnji svojih razrednika uživali na jesenjem školskom izletu.

Na Vrelu Bosne bili su učenici I₅, I₆ i I₃ razreda, a njihove kolege iz I₂ i I₄ išli su u Mostar. Bila je to prilika da se bolje upoznaju i steknu nova prijateljstva. Na Trebeviću su uz roštilj proveli učenici I₁, te treći razredi.





Drugi razredi su uživali u sunčanom danu na Bjelašnici, a maturanti nedaleko od njih na Javorovom dolu. Drago nam je da nas je lijepo, sunčano vrijeme poslužilo, pa smo svi kvalitetno proveli petak sa prijateljicama, prijateljima i profesorima.

Ema Selimović

Foto: Berin Šurković, Adna Hadžiselimović, Amel Jašarević, Esma Junuzović, Mirza Bakal, Zana Kapetanović i Tajra Osmanagić

Članovi Planinarske sekcije na Tjentištu

Naši učenici su 12. 10. 2019. posjetili kompleks spomen-obilježja na Tjentištu, općina Foča. Njih 17, u pratnji profesora Sejada Šenderovića i Abida Zukića, imali su priliku posjetiti spomenik žrtvama Drugog svjetskog rata iz Pete neprijateljske ofanzive NOB-a, sportsko-rekreativni centar „Mladost“, predio prašume



Perućica sa vodopadom Skakavac (70 m), te podnožje naše najveće planine Maglič.

Uz historijski čas koji je sa učenicima održan prilikom posjete, dan smo proveli u ugodnom druženju i sportskim aktivnostima.

Grad koji se ne zaboravlja

Nakon duge noćne vožnje kroz našu lijepu domovinu i prelaska preko granice do susjeda Hrvatske, napokon smo stigli u Zagreb, poznat po bogatoj prošlosti. Građevine stoljećima stare nadgledaju nove posjetioce, dok su precizni detalji raznolikih reljefa njihovih zidina pričali priče bez izgovaranja ijedne riječi.

Zagrebačka Katedrala, kraljica svih građevina, ponosno se izdizala u visinu, kao da pomno pazi na grad. Gotička dama čije tijelo zasigurno oduzima dah svakom ko je opazi. Nedaleko od te lijepe gospođe nalazi se Trg bana Jelačića. Njime dominira kip bana Josipa, danas okrenut prema jugu. Kada je kip 1886. godine prvi put postavljen na Trg, gledao je prema sjeveru, prema Mađarskoj.

Uz razgledanje znamenitih lokacija u gradu, posjetili smo i mnoge muzeje, od kojih je prvi bio Muzej iluzija. Ekspozicije nude intrigantno vizuelno, osjetilno i edukativno iskustvo i sigurno vrijedi posjetiti ga. Nakon toga uputili smo se ka Muzeju grada Zagreba. Utemeljili su ga Družba „Braće Hrvatskoga Zmaja“ 1907. godine i prikazuje razvoj grada kroz stoljeća. Posjeta ovom Muzeju odličan je način da se detaljnije upozna Zagreb i time zavoli još više.



Iako se nalazi dalje od već spomenutih muzeja, Tehnički muzej Nikola Tesla obavezno vrijedi posjetiti. Sastoji se od mnogobrojnih odjela, od kojih su neki: Odjel transformacijske energije, Odjel prometnih sredstava, Odjel astronautike sa planetarijem,

Odjel geologije, rudarstva i nafte, Demonstracijski kabinet Nikole Tesle itd. Imali smo priliku prošetati kroz model rudnika, uživati u čudesima zvjezdanog neba i prisustvovati predavanju o Nikoli Tesli i njegovim mnogim eksperimentima.

Zagreb je zaista grad vrijedan divljenja u kojem je toliko toga za vidjeti i naučiti. Mnogo je toga, a malo vremena, pa je svaka sekunda provedena u ovom gradu zlatna i neprocjenjive vrijednosti.

Ejla Sadiković



„Belgrade, my Belgrade...“



Učenci trećih razreda su vikend prije online sedmice iskoristili za studijsku posjetu Beogradu. U subotu, 2. 11. 2019, u dva ujutro dva autobusa su se uputila prema Beogradu. Oko devet sati su, pomalo umorni, stigli pred Muzej vazduhoplovstva. Dočekani neumoljivim vjetrom, koji je naše učenike razbudio, pošli su u obilazak Muzeja. Kroz izložbu su ih proveli uposlenici Muzeja koji su se trudili da im prenesu što više novih i zanimljivih informacija. Nakon zanimljivog obilaska i kratke vožnje autobusima, učenici su još obišli i Muzej primijenjene umjetnosti i Kalemegdan. Potom su dobili i željno iščekivano slobodno vrijeme koje



su iskoristili da prošetaju Knez Mihajlovom ulicom, pojedju nešto i kupe neki suvenir. Pri kraju slobodnog vremena kiša ih je otpratila do autobusa koji su ovoga puta odveli naše učenike u Hotel „Jugoslavija“, gdje su se odmorili i spremili za noćnu plovidbu Dunavom i Savom. Poslije plovidbe učenici su ponovno autobusima došli do centra Beograda gdje su imali slobodno vrijeme koje je većina iskoristila u zatvorenom zbog jakog vjetro. Ostatak večeri su proveli u hotelu, družeći se u sobama. U nedjelju, 3. 11. 2019, nakon doručka i odjave iz hotela, jezičari i društvenjaci posjetili su Muzej Ive Andrića, dok su učenici drugih smjerova posjetili Muzej Nikole Tesle. Nakon obilazaka muzeja učenici su iskoristili slobodno vrijeme i obišli šoping-centar „Ušće“. Oko četiri sata popodne autobusi su krenuli prema Sarajevu. Naši učenici i profesori doživjeli su lijepo iskustvo i kreirali uspomene koje će još dugo pamtili.

Helena Bogdanović

Zašto ne bismo obilježili maturu onako kako rade u svijetu?

Članice sekcije CIVITAS Treće gimnazije Nađa Ajanović, Nejra Buljina i Nađa Osmanagić sa profesorom Građanskog obrazovanja i demokratije Sejadom Šenderovićem 9. 10. 2019. godine posjetili su Rektorat UNSA-e.

Cilj naše posjete bio je dobijanje što više informacija o načinu organizacije promocije maturanata, i to cijele generacije kantona Sarajevo. Razgovarali smo o mogućoj lokaciji promocije, neophodnoj informatičkoj podršci, koordiniranju i, naravno, onome što se ne može zaobići - finansiranju jednog takvog skupa.

Rečeno nam je da je ideja dobra, da smo krenuli na vrijeme, da treba mnogo raditi na jednom ovakvom projektu i da neće biti lako, ali su nas svesrdno podržali.

Maturirati znači sazreti, položiti ispit zrelosti, preći iz djetinjstva u odraslu fazu. Značajno je za nas, profesore i naše porodice. Zašto ne bismo obilježili završetak srednjoškolskog obrazovanja onako kako rade u svijetu?

Vrijedi pokušati i zato je svaka pomoć dobrodošla!



Nađa Ajanović

Praktična citologija u „Suncu“



Od 26. do 28. novembra 2019. godine učenici III₅ i III₆, u pratnji profesorica Melihe Salihović i Edine Hodžić, posjetili su Polikliniku „Sunce-Agram“. Učenici su imali priliku, u sklopu STEM-nastave, posjetiti citološki laboratorij Poliklinike. Bili su u mogućnosti upoznati se o uslovima rada, koristiti modernu opremu i proširiti znanje o citologiji.

Zahvalni smo zaposlenicima laboratorije na izdvojenom dragocjenom vremenu, gostoprimstvu, a posebno zahvaljujemo dr. Aidi Ajanović, koja je omogućila realizaciju ove posjete.

Mirza Bakal

Posjeta trećem sajmu „Knjige u nišama“

U četvrtak, 28. 11. 2019. godine, učenici III₃, u pratnji profesorice Dženane Nezirević, posjetili su sajam pod nazivom „Knjige u nišama“ koji se treći put održavao u prostorijama JU Bosanskog kulturnog centra u Sarajevu. Uživajući u bogatom i zanimljivom repertoaru vodećih bh. izdavačkih/nakladničkih kuća kao što su Dobra knjiga, Vrijeme, Buybook, Sinopsis te mnogih drugih, uveličali smo praznik izdavaštva, kulture i čitanosti. U sklopu programa ovogodišnjeg KUN-a koji



uključuje predstavljanje autora, brojne radionice, promocije knjiga, te druženje i razgovor s književnicima, bili smo u prilici prisustvovati predavanju Damira Uzunovića, predstavnika Zajednice izdavača/nakladnika u BiH, prema čijim riječima, izdavačko-autorski sajam „Knjige u nišama“ ima festivalsku prirodu s obzirom na to da je uređen kako bi privukao i zaintrigirao publiku koja voli književnost te predstavljanje autora i knjiga. Uspjeli smo biti dijelom radionice pod nazivom „Praktično bibliotekarstvo za studente“ organizatora fondacije/zaklade Kemala Bakaršića. Priželjkujemo uspješnu realizaciju i sljedećeg, četvrtog izdavačko-autorskog sajma „Knjige u nišama“, te organizaciju i provedbu sličnih kulturnih događaja, koje će radoznali učenici Treće gimnazije u pratnji profesora uveličati dolaskom.

Zana Kapetanović
Foto: Eman Alibalić

Bili smo i na Zimskom salonu knjige

Učenici I₄, II₁ i II₆, sa profesoricama Dženanom Nezirević i Aidom Burak, posjetili su 15. Zimski salon knjige u galeriji Collegium Artistic.

Obilaskom štandova brojnih izdavača mogli smo pronaći raznolike naslove, od književnih klasika, beletristike do stručne literature.



Bila je ovo prilika da zaboravimo moderne tehnologije i društvene mreže. Zahvaljujući sajamskim cijenama, učenici su obradovali sebe, ali i drage osobe za novogodišnje praznike.

Radujemo se novom susretu na proljetnom sajmu knjige!

Ejla Sadiković

Promocija Zbornika radova „Alija Isaković i bosanski jezik“

Članovi Literarne sekcije, pod vođstvom profesora Džemaludina Poturovića, prisustvovali su promociji Zbornika radova „Alija Isaković i bosanski jezik“, koja se održala 19. 11. 2019. u Gazi Husrev-begovoj biblioteci u Sarajevu. Promotori su bili: prof. dr. Dževad Jahić, prof. dr. Alen Kalajdžija, prof. dr. Uzeir Bavčić i prof. dr. Alija Pirić, a moderatorica programa bila je Elmira Resić. Prema riječima prof. Jahića, treba pažljivo iščitavati tekstove „Zbornika“ te tako spoznati Bosnu kao kulturno-historijski prostor koji ima svoj odraz u jeziku i književnosti. Učenici kažu da im je prisustvovanje promociji omogućilo da spoznaju svoju domovinu na jedan novi način, inspirisalo ih i potaklo da pišu i misle o bosanskom jeziku, te omogućilo da shvate važnost jezika koji je, uz ostalo, prema riječima Alije Isakovića, i naš moral.

Merjem Gutošić



Zaljublivanje uz predstavu „Radnja na uglu“

U pratnji profesorice Amile Huseinbašić, učenici I₃, I₄, I₅, II₃ i II₅ razreda naše škole su gledali predstavu „Radnja na uglu“, L. Miklosa. Ova romantična komedija je lagana i neopterećena, a bavi se prijeratnim odnosima među ljudima koji su se nakon rata promijenili. Muhamed Hadžović i Vanesa Glođo su uz glasan smijeh stekli simpatije publike.

Adla Veljović





Nasmijali smo se uz „Umri muški“

Učenici drugih i trećih razreda naše škole, u pratnji profesorica Dženane Nezirević i Aide Burak, pogledali su 21. 12. 2019. godine u Kamernom teatru 55 predstavu „Umri muški“.

Kamerni teatar smo napustili nasmijani i oduševljeni izvedbom odličnog glumačkog ansambla predstave koja govori o ljubavnom trouglu između Eve, Marija i Brune u režiji Admira Glamočaka, a u uzvedbi Tatjane Šojić, Admira Glamočaka i Senada Bašića.

Lejla Krehić

Foto: Lamija Imamović

Dirljiva i uzbudljiva radnja predstave „Snijeg“

Učenici IV₁ i IV₂, u pratnji razrednica Edine Lokvančić i Elme Mašnić-Šikalo, posjetili su 26. 12. 2019. godine Narodno pozorište i gledali predstavu „Snijeg“, zasnovanu na istoimenom romanu turskog nobelovca Orhana Pamuka, u režiji Dine Mustafića.

Bez obzira na to što predstava traje tri sata i dvadeset minuta, pažnja i oduševljenje publike nisu jenjavali ni za trenutak.

U priči o političkim i društvenim problemima moderne Turske sadržane su teme koje su bolna tačka i našeg društva, kao što su težak položaj žena, korupcija, siromaštvo, nezaposlenost i iseljavanje.

Dirljiva i uzbudljiva radnja, odlična gluma i režija te fascinantna scenografija ostavili su na naše maturante snažan dojam. Ovu predstavu ćemo, sigurno, dugo pamti.

Nenadmašna i posebna „Holverova noć“

Učenici I₃, I₄, I₅, II₃, i II₅ sa profesoricom Amilom Huseinbašić su 2. 12. 2019. gledali predstavu „Holverova noć“ Ingmara Vilkvista, u kojoj je prikazana tragična priča majke i djeteta sa mentalnim poteškoćama za vrijeme Hitlerove vladavine u Njemačkoj. Mnogi su sa suzama u očima odgledali emotivne scene navedene predstave, cijeneći izuzetne glumačke sposobnosti Mirjane Karanović i Ermina Brave.

Adla Veljović

Pogledali smo „Naš razred“ u Kamernom

Učenici drugih i trećih razreda naše škole, u pratnji profesorica Dženane Nezirević i Aide Burak, pogledali su 19. 9. 2019. godine u Kamernom teatru 55 predstavu „Naš razred“.

Kamerni teatar napustili smo oduševljeni izvedbom sjajnog glumačkog ansambla predstave koja progovara o stradanju Jevreja tokom Drugog svjetskog rata, izdaji i lažnom prijateljstvu, u režiji Dine Mustafića.

Lejla Krehić

Foto: Amel Jašarević

I za kraj 2019 – „Knjiga mojih života“

U petak, 27. 12. 2019, od 20 sati u Kamernom teatru 55 pogledali smo predstavu „Knjiga mojih života“. Učenici I₁, I₂, I₆, III₂ i III₆, u organizaciji profesorice Senade Turajlić, u pratnji i prof. Sanje Salihović i Dženane Nezirević, uživali su u predstavi urađenoj prema istoimenoj zbirci eseja Aleksandra Hemona u režiji Sabine Begović-Ćorović, u kojoj su glumili Boris Ler, Maja Izetbegović, Amar Selimović, Mirna Jogunčić, Sabit Sejdinović i Merima Ovčina.



Azra Alagić: „Protivnik sam odlaska i svoj život želim izgraditi u domovini“

Učenica je koja se ističe angažmanom i znanjem. U prethodnoj školskoj godini učestvovala je na mnogobrojnim takmičenjima, osvojila je 2. mjesto na kantonalnom i 5. mjesto na federalnom takmičenju iz fizike te 3. mjesto na kantonalnom takmičenju iz matematike.

U koju si osnovnu školu išla i koliko su tvoji bivši profesori utjecali na tebe?

Išla sam u Osnovnu školu „Skender Kulenović“. Nastavnica matematike Alma Ćuprija i nastavnik fizike Elvir Dreca su velikim dijelom zaslužni za moje rezultate. Voljom i trudom potaknuli su me na dodatni rad, na čemu sam im beskrajno zahvalna.



Kakva je atmosfera na osnovnoškolskim takmičenjima, a kakva na srednjoškolskim?

Atmosfera je slična. Razlika je u tome što se u osnovnoj školi otkrivaju nadareni učenici, dok su u srednjoj oni već poznata lica i pristup je ozbiljniji.

Današnji srednjoškolci mnogo vremena provode na internetu. Imaš li prijedlog kako da se to vrijeme utroši korisno?

Često nismo ni svjesni koliko nam internet pruža mogućnosti koje, npr. naši roditelji nisu imali. Ako nam neko gradivo nije jasno ili želimo naučiti više, imamo pristup brojnim knjigama i radovima, ali i inovativnim načinima razumijevanja tog gradiva. Neki od najboljih svjetskih univerziteta kao što je MIT na internetu objavljuju čak i čitave kurseve. Nikad nije bilo lakše doći do znanja, jedino su potrebni radoznalost i volja.

Predstavljaju li vannastavne aktivnosti zadovoljstvo ili stoje na putu redovnim školskim obavezama?

Uz nesebičnu podršku profesora Alise Ramić i Sadika Omerovića, redovne i vannastavne obaveze mi predstavljaju jednu cjelinu i nije mi teško uskladiti ih.

Je li moguće imati ispunjen društveni život i u isto vrijeme postizati izvanredne akademske rezultate?

Naravno da jeste. Pripreme za takmičenja oduzimaju dosta vremena, ali ne toliko da utječu na druge aspekte života.

Uloženi trud će te sigurno dovesti do uspješe budućnosti. Šta namjeravaš raditi nakon završetka obrazovanja u srednjoj školi? Koliko su ti takmičenja i dobri rezultati pomogli pri izboru?

Nisam još odlučila, ali znanje iz matematike i fizike će sigurno igrati ulogu u tome.

Koje je tvoje mišljenje o aktuelnoj temi odlaska mladih obrazovanih ljudi iz BiH? Hoćeš li „svijetlu budućnost“ graditi u domovini ili se, ipak, nadaš odlasku?

Protivnik sam odlaska zasto i svoj život želim izgraditi u domovini.

Kako najčešće reaguješ na pohvale/kritike? Kako na tebe utječu oni koji te podupiru ili kritikuju?

Pohvale na mene djeluju motivirajuće, a pogotovo kada dolaze od nekoga ko mi je uzor ili koga posebno cijenim. Najveći kritičar sam sama sebi.

Zana Kapetanović i Ema Selimović

Iman Pašić, čarobni glas naše škole

Iman Pašić, učenica naše škole i Srednje muzičke škole, od 21. 11. do 26. 11. 2019. učestvovala je kao pobjednik muzičkog festivala "Djeca pjevaju hitove" na festivalu u Novom Sadu koji nije bio takmičarskog karaktera. Ciljevi su bili druženje, uspostava saradnje sa predstavnicima Srbije, Bosne i Hercegovine, Crne Gore i Makedonije.

Iman se predstavila sevdalinkom "Moj dilbere" te oduševila sve prisutne i zahvalila organizatorima na nagradama.



Organizatori su priredili brojna iznenađenja za učesnike, uz ostalo, i posjetu Petrovaradinskoj tvrđavi, obilazak Novog Sada, Sremskih Karlovaca, te na taj način su uljepšali i obogatili druženje.

U prepunoj sali Hotela Hollywood 11. 12. premijerno je izvela himnu za djecu sa posebnim potrebama čiji je autor predsjednik Udruženja "Bašlija", uz pratnju Folklorne sekcije i djece sa posebnim potrebama i osoba sa invaliditetom. Članovi Udruženja "Radost

života" bili su oduševljeni pjesmom te su sa Iman otvorili i zatvorili specijalni program upriličen za predstavnike Ministarstva, Prosvjetno-pedagoškog zavoda, kao i brojne profesore i nastavnike srednjih i osnovnih škola. Na kraju večeri dodijeljena joj je posebna zahvalnica kao izvođaču za sveukupnu podršku i razumijevanje u radu.

Izvedbom talijanske opere "Funiculì, Funiculà" naša Iman Pašić oduševila je švedsku princezu Victoriju i njenog supruga princa Danijela 7. novembra 2019. na Muzičkoj akademiji.



Elma Slabić: „S ljudima, čije sam postere kao mala lijepila po zidovima, izađem na kafu poslije škole“

Kada se javila želja za pokretanjem projekata?

Uvijek sam voljela aktivizam, organizaciju, kontakt s ljudima. Prije sam često bila dio projekata, ali prvi put sam sama nešto organizirala kada sam bila prvi razred. Bilo je spontano, na času kod profesorice Amile Huseinbašić. Tada sam dobila ideju i priliku da organiziram večer poezije. Gosti su bili Abdulah Sidran, Goran Simić, Semka Torlak i bivša učenica Nejla Bihorac.

Od svih projekata koje si do sada uradila, je li moguće izdvojiti tebi najdraži?

Svaki je poseban na svoj način. Kroz godine projekti su se mijenjali sa mnom... Međutim, izdvojila bih konferenciju za mlade „Business is FeMale“. Bilo je prijavljeno oko 500 ljudi. Gosti su bili neki od najvećih bh. imena, uticajnih javnih ličnosti. Uz osam govornika, imali smo i dvadesetak gostiju, uspješnih ljudi iz svih oblasti.

Koja je svrha tvojih dosadašnjih projekata?

Uglavnom, svrha je da motivišem vršnjake te da pokažem da se u našoj zemlji može uspjeti. Često mi zasmeta kada kažu da ko zadnji ode, neka ugasi svjetlo... Nema potrebe da ga ugasio, zajedno ga možemo upaliti. Voljela bih da ljubav prema ovom gradu i državi, koju osjećam, prenesem na vršnjake. Pokazala sam i da se može uticati na druge. Drago mi je vidjeti kako se vršnjaci udružuju oko lijepih i korisnih ideja i pokreću vlastite projekte.



Kako reaguju na tvoje uspjehe?

Mišljenja su podijeljena, naravno. Oni koji me podržavaju, interesuju se za moje projekte i posjećuju ih. Važno je doprinijeti zajednici, jer za jednog srednjoškolca, tužno je reći da u njegovom CV-u piše samo koju je školu završio.

Možeš li izdvojiti neke drage nagrade?

Moja najveća nagrada je ta što su moji roditelji ponosni na mene... Uvijek ističem nagradu „Snaga izvrsnosti“ - nagrada za najuspješniju ženu. Ja sam bila najmlađa nominovana u kategoriji društvenog angažmana. Ono što mi je otvorilo mnoga vrata je i članstvo u Junior PR timu Grada Sarajeva, gdje nas 30 učenika predstavlja srednjoškolce. Pokrećemo projekte, u

njima sudjelujemo i tražimo načine kako da poboljšamo život.

Kada bi mogla porediti sebe sada i kada si došla u Treću gimnaziju, šta se promijenilo? Šta si voljela tada, a šta sada?

Kada bih mogla sada vidjeti sebe prije četiri godine, ne bih vjerovala... Kada sam kročila u Treću gimnaziju, bila sam sigurna da ću upisati matematičko-informatički smjer, da ću biti programer.

Mnogo sam se, dakle, promijenila. Moja skrivena želja je da budem astronaut ili pilot, ali realnija opcija je baviti se aktivizmom, biti menadžer, a jednog dana biti i gradonačelnica Sarajeva.

Koja bi bila poruka koju bi poslala mladim ljudima?

Mož životni moto je da se ništa u životu ne podrazumijeva. Ne zaboravite, ono što su vam rekli da ne možete uraditi, jednog dana to uradite i budite ponosni. Od malih se stvari počinje. Počela sam od malih projekata. Ljudi, čije sam postere kao mala lijepila po zidovima, danas čine moj bliski krug. S njima izađem na kafu poslije škole...

Smatram da je svaka promjena, koja se dogodi u ovim srednjoškolskim danima, od velike pomoći. Ta pomoć može biti usmjerena tako da lako shvatimo ko smo ustvari.

Ajna Đapo



LIST IZDAJE NOVINARSKO-FOTOGRAFSKA SEKCIJA

VODITELJICE NOVINARSKO-FOTOGRAFSKE SEKCIJE

Dženana Nezirević i Senada Turajlić,
profesorice Bosanskog jezika i književnosti / Hrvatskog jezika i književnosti / Srpskog jezika i književnosti

GLAVNA I ODGOVORNA UREDNICA

Senada Salihović, direktorica Treće gimnazije

ČLANOVI NOVINARSKO-FOTOGRAFSKE SEKCIJE

Tajra Osmanagić, Mirza Bakal, Ema Ćatić, Nađa Osmanagić, Hana Salom, Helena Bogdanović, Esmā Junuzović, Zana Kapetanović, Martina Kostić, Amel Jašarević, Ajna Đapo, Tea Dedić, Alisa Bjelonja, Lejla Krehić, Nejla Imširović, Hana Lučkin, Emela Bahtanović, Hana Kadrić, Aydin Džebo, Hana Džananović, Berin Šurković, Izeta Redžepi, Farah Piralić, Tarik Hadžiomerović, Adel Košarić, Irfan Živojević, Emin Mujezinović, Emin Kapetanović i Arabela Murtić



LEKTURA I KOMPJUTERSKA OBRADA

Dženana Nezirević i Senada Turajlić

GRAFIČKI DIZAJN I DTP

Fadil Pleho

ŠTAMPA

Tipografija d.o.o. Sarajevo

Tel.: 033/238-489

E-mail: tipografija.sarajevo@gmail.com



ADRESA REDAKCIJE

Treća gimnazija, Vilsonovo šetalište 16, Sarajevo

Tel./Fax: 033/724-500

E-mail: info@treca-gimnazija.edu.ba

Web: www.treca-gimnazija.edu.ba



Sarajevo, januar 2020.

